


MÈÈSÀ À MUKALENGE

 . . . pa muminu wànyì bifùmìne ku masangisha àbùngì, dikùmi ne àtaanu, mu Arizona. Bapicìle mu cikondo cilenga cyà dikèma. Mukalenge Yesù mmutùbènèshe ànu byà menemene, byà biyiila ne panshi. Mbatèètù kukwàta mudimu kakesè ne mùshindù wà dyenza wà Mukalenge, ndi mutwìshìibwe ne, ncifwànyine kwikala mùshindù mujaalàme wà dicyàmba, kubwelamù ne kwanji kuteemesha mwaba awu, dyàmbedi. Mèmè kubwelamù matùkù mulongologo kumpàla, kwenza masangisha dikùmi anyì dikùmi ne àbidì ku èkèleeziyà yà minène yònsò mu Phoenix mujimà, mu Sunnyslope ne mu Tempe ne mu Mesa ne kwònsò aku, ne mu mùshindù kampànda kuteemesha mu nyungulukilu mwònsò amu ne pashiishe kuciludikila cyònsò ku malòlò àtaanu a mpungilu awu. Nènku civwa mmpungilu wa mutàmbe bunène utùdiku benzè mu Àmèrikè wa ku Nord. Úvwa nngwa munène. Didyà dyà dindà dyà ditàmbe bunène, ne—ne kàbidì didyà dyà—dyà mikùükùku dilòlò adi.

² Ncyèna ànu mwà kwamba ne bàakapetà Nyumà Mwímpè bàvwa bùngì kaayi to. Bìvwa—bìvwa bilenga byà dikèma bwà bùngì bwà bàakapetà Nyumà Mwímpè, ne bùngì bwà bàakondopiibwà ne—ne bàakasùngidiibwà, bìdi—bìdi ànu bilenga byà dikèma. Pa nànkù tudi ne kusàkidila kùdì Nzambi patùdì tumòna cikondo cyènda cìya apa. Bantu banènè bààbùngì bààkabwela. Umwe wa ku . . .

³ Eci necyènzèlè Mwanèètù Neville bìmpè bikolè. Mèmè kumòna mwambi kampànda wa ba-Presbytériens, wa mu Cilongelu cyà citàmbe bunènè cyà ba-Presbytériens cyà mu . . . cyà mu ditùnga edi, ùja maja mu Nyumà. Kaa, ekèlekèle, civwa bulelèlèlà cintu kampànda, kupetayè Nyumà Mwímpè. Ki dìbà adi kungambilayè, wàmba ne: “Ndi mupetè wùmwe wà ku mikàbà yèbè yà méyi.” Yèyè ne: “Kawùvwa mwímpè menemene to.” Yèyè ne: “Wùvwa ànu wùzakalala, kàdi,” yèyè ne, “mèmè kuya naawù buludì mu cilongelu citùmbùke amu ne kuwèla.” Ki yèyè ne . . . Bu mùvwàye muntu munène wa dilonga dyà nsòmbelu muntwamu, yèyè wàkabàlama bònsò mu cinyàànyà. “Èè, bàCitéèlejìkù musangu nànsha wùmwe, nànsha byà munyi,” mwàkambàye. Ki kwambayè ne ùvwa . . .

⁴ Ki yèyè ne wàkadìtwa mu dija dyà maja mu Nyumà mu èkèleeziyà wendè, paanyimà pàà yèyè mumanè kupeta Nyumà Mwímpè, nènku bòbò kwamba ne: “Révérend, neuyiilè mwà kutwà dikàsà dipyadìpyà dìbà kaayi?”

⁵ Yèyè ne: “Pànji disangisha dyànyì kuyiila edi nùnkù.” Ngeela meeji ne aci civwakù cilenga cilayà, nudi bamanyè’s,

mulombodi wà ba-Presbytériens's, èyowà, wàmba ne: "Pànji disangisha dyànyì kuyiila edi nùnkù." Pa nànkù aci's ncintu cìmpè. Ànu mùdi mwànà mukèsè wa mu dibòko, ànu wa mupyamùpyà's kàdi pèndè's ùkaadi. . . Èè, s'nudi bamanyè cidì cifwànyine kukèngela bwà kwikalayè, bwà kwikala mulongeshi wa dilonga dyà nsòmbelu mu Cìlongelu citàmbe kutùmbuka cyà ba-Presbytériens cyà mu Boston, èè, mmu Ètats-Unis.

⁶ Mémè kumòna umwe wa ku bàà bangàngàbuka bapandi bàà myoyi bakùlù bàà ba-Mayos ùyiisha Èvànjeeliyò mu Nyumà ne wàkula mu myakulu. Kaa, ekèlekèle! Mémè kumòna ngàngàbukà mukwàbò mupilùke, uvwa Adventiste du Septième jour, wa mu. . . Ùvwa kàbìdì ngàngàbukà mu—mu—mupilùke wa myoyi ne mabòdi kàbìdì, nènku yèyè, muntu mukùlákàji, kupetayè dibàtiiza dyà Nyumà Mwímpè. KuMupetayè. Dilòòlò kampànda mémè kumutentekela byanza mu mbàlandà, ne kupetayè Nyumà Mwímpè. Pa nànkù tudi. . . bintu búngì cyanàànà bìdì Mukalenge wetù mwenzè bitùdì naabì ne kusàkidila, ne nangàngà pa kumòna cikondo eci.

⁷ Pashìshe mémè kubàmbila ne: "Nudikù bajingùlùle ne mmu díbà kaayi mutùdì pàdì virgò mukùtākàne awu ùbanga kulòmba maanyi anyi?" Cìvwa ncikondo cyàkalwà Mubàki, ne bantu, bàvwà badìlongòlòle babwelè. Kaa, ndi ne disànkà dyàbúngì dyà kumanya ne tudi ne mwoyi mwab'ewu mu matùkù a ndekeelu aa. Nwamònu anyi? Ndi ngeela meeji ne tudi ne mwoyi mu cimwè cyà ku bikondo byà bitàmbe kwikala bilenga byà dikèma bikaadiku bàà pa buloba bapetè, ànu pa mulààdilu menemene wà Dilwa dyà Mukalenge. Abi kì mbilenga bilayà anyi? Elààyibì meeji ne, pa díbà kanà dyònsò mpindyewu, Mifundu yònsò yikaadi ànu pabwìpì ne kuula! Nènku tudi baMwindile pa díbà kanà dyònsò. Nènku bivwa bikèngela twètù kwikala ne mwoyi mu dindila dyà mùshindù awu, ne, ànu pa díbà kanà dyònsò cidì mwà kwenzeka. Ikàlaayi mu cyuyùya cyà disambila, badìlongòlòle!

⁸ Mu yimwè yà ku miyiiki yà bàbìdì leelù ewu, mémè, ùmwè, ndi mutwilàngàne ne mpandanjila kampànda wa ku Formosa, mukàji wa bukitù, wa bidimu makùmi mwandamutekètè ne bisàtù, kàdi mufwànyine kwangaciibwa bu wa bidimu bitwè ku makùmi ànaayi ne bitaanu. Wa bwala yèyè ùcidì ànu—ànu Màndèmwàzelè, ne ùvwa ne cyà kwikala nsongàakàji mulenga kwisù. Ne ùvwa wàmba ne mmukolèle mu dikù dyà beena Kilistò mùvwà "èyowà" mwikàle èyowà, ne "to" mwikàle to. Nènku mmukolèle mu dilongesha dyà maalu muumisha adi. Ki kwambayè ne: "Mwanètù Branham, pàmvwà ne bidimu bu, kaa," yèyè ne, "bidimu bitwè ku mwandamukùlù, mvwa ndyàmbidila ne mvwa mufile mwoyi wànyì kùdì Mukalenge Yesù." Yèyè ne: "Pàngààkapetà bidimu bitwè ku dikùmi ne bibìdì, mémè kuseeswishiibwa kùdì mwambi kampànda wa cyena-màngumba ne, ndi ne cyà kupeta dibènesha diibìdì," ki

yêyè ne, “ki mêmè kuseeswishiiwbamù bibi be.” Kàdi yêyè ne: “Pàngàakapetà bidimu bitwè ku dikùmi ne mwandamutekète, mêmè kupeta cyà bushùwà Nyumà Mwîmpè.” Nènku yêyè mmwalùkìlè mûneemu mpindyewu ùteeta bwà kutàbuluja yimwè yà ku èkèleeziyà yà ba-Baptistes yidi milààle eyi. Kwambayè ne ní—ní kùvwa cintu cikaadiyekù mumòne ne “ncifwè,” yêyè mwinè awu m’Baptiste, yêyè ne, “ng’èkèleeziyà mifwè yà ba-Baptistes eyi kuntweku.” Kuyibiikilayè ne “nzùbù yà bitàlù.”

⁹ Mêmè ne: “Èè, ngeela meeji ne paùdi ku mwalu wà mvita . . .” Ngeela meeji mpindyewu ne yêyè ùdi . . . Anjì elààyibi ànu meeji, mêmè ewu, ne bidimu makùmi àtaanu ne bìbìdì, yêyè ùkaavwa muyè bu mpandanjila kumpàlà kwà mêmè kulediibwa. Nènku mêmè kùnu ngeela meeji mùmvwà ngenda nkùlakaja ncìciyi mwà kuya mu budimi bwà bwambi. Nènku ndi ngeela meeji ne: “Èkèlekèlè, mfwilèku luse, Mukalenge.”

¹⁰ Kàdi yêyè, ne mubidi tumatuma, mukolàkàne kàbìdì ne meeji matwè ne mwèndè mwònsò. Ne pashìishe ùndondela malabula a mu njila, ne mùvwà Èvànjeeliyò ùkèngediibwa mu Formosa ne—ne mu Chine, ne mu Japon, ne myaba mikwàbò. Ki kumuumushabò mu budimi bwà bwambi, bàmba ne: “Kwèna mwà kuya mu madimi a bwambi paanyimà pàà wèwè mumanè kwikala ne bidimu bipite pa makùmi mwandamutekète to, udi mumanyè’s.” Ki kumwalujabò. Kàdi yêyè kààkushààla mupùwe to, ùdi ùya ku mpungilu yònsò yà ba-Baptistes eyi. Ki yêyè ne: “Billy Graham,” yêyè ne, “mùshindù wùvwàye ùtwàla mukenji wà ba-Baptistes awu, s’ndipangisha èkèleeziyà wà ba-Baptistes bwà kuya kumpàlà.” Yêyè ne: “Kèna ùbàfikisha kule menemene bwà kupetabò Nyumà Mwîmpè to,” mwàkambayè. Kaa, mwanèètù wa bakàjì, shààla wèwè ànu ne cyòci aci. Aci ncyà bushùwà. Kwambayè ne, ba-Chinois abu kuntu kwàka, kwambayè ne kàvwakù mufwànyine kubàlekela bàya ànu nànu bàmba ne: “Tudi twitabuuja Yesù Kilistò” to. Yêyè ne: “Bivwa ànu bìmpè,” kàdi yêyè ne ùvwa ùbàshààdisha mwab’awu too ne pàvwa cintu kampàndà cyènzeka, ne dîbà adi bàlwa beena Kilistò bàà cyà bushùwà.

¹¹ Mêmè ne: “Ki mùshindù wùyaayàbì’s, mwanèètù wa bakàjì. Ùbàmbilè wèwè ànu cyanàànà, bàshaalè too ne pàdì cintu kampàndà cyènzeka.”

¹² Mpindyewu, ambaayi tũng bu ne bàpostòlò bàakamba, paanyimà pàà matùkù citèemà ne: “Tudi twitabuuja ne twàMupecì, nwamònu’s, tùMwitàbùùjaayi ànu ku diitabuuja cyanàànà ne tütungunukàayi ne mudimu wètù.” Nwamònu’s, nùnkù kî mbikùmbànekù to. Bààkindila muntwamu too ne pààkamanyàbo ne cintu kampànda cyàkenzeka. Nènku ki lutàtù lutùdi naalù twètù leelù ewu ndwòlò alu, katwèna tushààla ntàntà bule bukùmbàne to. Èè, ki bwà cinyi pashìishe tudi mwà kwikala ne nsòmbelu ànu wa mùshindù kanà wònsò, kwenza

cintu kanà cyònsò, kabiyi bitùtácisha to, mbwalu katwèna tushààla mwaba awu ntántà bule bukùmbàne to. Leelù tudi munda, mààlabà tudi pambèlu, ne mùshindù *kampànda* ne mùshindù *kansanga*. Twètù tushààla ntántà bule bukùmbàne too ne paùdi ubwela ne ukànga ciibi paanyimà pèèbè, díbà adi neùshaadilè munda amu. Udi mutwibwe citampì too ne ku ditùkù dyà bupikudi bwèbè. Mémè ndi ne disànkà be bwà bwalu abu.

¹³ Nènku tudi bapicìle mu cikondo cyà dicyònkomoka, bu mûmvwà mwambè, mu Phoenix ne mu cibandabanda ne munkaci mwà bààbúngì bàà ku beena Kilistò mwàmwa, bààbúngì bàà kùdìbo kacya bààkwatakù ne mwoyi mujimà.

¹⁴ Ngàkabànda ku Mukùnà wa ku Sud, mukàjàànyì udi paanyimà pààpa wàwa, ne mémè. Dìngà ditùkù, balundà bàànyì, mwanèètù wa balùme, Doc, mulamè bânà bàà bakàjì bàbìdì abu, ne—ne Mwanèètù wa balùme ne Mwanèètù wa bakàjì Wood balamè mwànà wa balùme awu, nènku mémè ne mukàjàànyì tuvwa twenza dipèngama dyètù diibìdì dyà kacya tusèlangana. Ki mukàjàànyì ne: “Bill, udi mumanyè’s, edi nùnkù dívwa dipèngama ditàmbe dyà kumpàla adi.” Yèyè ne: “Musangu wà kumpàla wutwàkayà bwa dipèngama awu, cintu cimwèpelè cìngààkenzà cívwa ànu kusòmba mu citùùdilu ne kwindila bwà wèwè kufùma ku dilemba dyà nyama,” mwàkambàye.

¹⁵ Ngàkenza bu kaadiyelè kakesè, nudi bamanyè’s. Mémè kudyàmbidila ne: “Èè, mpindyewu, ncyèna ne mfrangà yàbúngì to.” Muyilamine mu kaamukèbù kàà lwevènyà, mikùmbàne bwà kuya mu lwendu lwà bulembi, kàdi pààbì’s mvwa ne cyà kusèlangana mu muvù wà mabèjì àpòòpoka awu. Ki mémè kudyàmbidila ne: “Ndi mbisanga ànu byònsò pàmwè,” nudi bamanyè’s. Nènku—nènku pàmvwà nya mu lwendu lwà bulembi apu, cívwa mwà kwenza bu dipèngama adi, nudi bamanyè’s, nènku ki twètù kubilamakaja’s. Kàdi ewu musangu twàkatùùla mfrangà ne twàkaya cyà bushùwà, ne, mòna’s, twètù kupicila mu cikondo cyà dicyònkomoka.

¹⁶ Ne bààbúngì bàà kùdìbo bàvwa bàà mu tabernacle emu. Ngeela meji ne Mwanèètù Sothmann, díkù dyèndè didi paanyimà pààpa, ne Mwanèètù Tom Simpson ne bakwàbò, ne Mwanèètù Maguire, ne twètù bònsò twàkapicila mu bikondo byà dicyònkomoka mu Mukalenge.

¹⁷ Nènku twètù kubànda ku Mukùnà wà ku Sud, wùdì ànu lwà ku sud kwà Phoenix, ne twètù kubànda e kushiyangana ne kàyùmbayùmba. Uh! Kàyùmbayùmba kàà mu cimenga cyà bwena-leelù aku’s! Kabyèna bikèmesha to pàdì bantu bàbanga kuvulangana pa buloba, mpèkaatù, ne ciputuku cibanga. Nènku mémè kutàngila kuulu aku, ne basòmbè lwà kuulu menemene aku bwà twamònakù mwà kumòna cibandabanda cyà Phoenix, mémè kwambila mukàjàànyì ne: “Ndi ndikonka ne mmisangu

bûngì kaayi, kacya ànu twashààla basòmbe kaaba aka mu tusunsa dikùmi ne tútaanu etu, yìdì Dìna dyà Mukalenge ditèèdìibwe citèèlàtèèlà mu cimenga cyàcya?” Hmm?

¹⁸ Twámbe ne, èè, mu mwaba wà cimenga cinène, tubadilamù ne Tempe ne—ne Sunnyslope, ne mwónsò amu, ndi ncinka ne mùdi mùlìyò mujimà wà bantu mu cibandabanda aci. Mémè ne: “Kùkaadi bidimu nkàmà yisàtù kùvwàmù kamùyì cintu to ànu ntùlu ne mibwàbwà mwómò emu. Ne pàmwàpa, ku mèsù kwà Mukalenge, bìvwa bifwànyine kwikala bìmpè bu ne bìvwa mwà kwalukila mùshindù awu.” Ncyà bushùwà. Nànsha mùvwà cimenga cinène—cinène cidìbo bìibaka mwaba awu aci, ne nzùbù milenga kumòna ne bikwàbò, bìikàle bilenga amu. Kàdi bìvwa bifwànyine kwikala bìmpè, bìvwa bifwànyine kwikala bitàmbe bwìmpè bu ne balùme ne bakàji bàvwa bàbànda bàpweka mu misèèsù ne byanza byela muulu, bìikàle bàtùmbisha Nzambì ne bàMwela twasàkidila. Kàdi, pamutù pàà cyòci aci, mmilawu, bintu byà lukutukutu, ndinwà dyà maalà. Dishidimuka didìdingè ànu dibwelèmu, ki lwonji lùdi lùlwamù.

¹⁹ Mémè ne: “Mmasandi bûngì kaayi àdi menda makèèlèlà dilòòlò, makèèlèlà dilòòlò awu mu cimenga eci! Mbantu bûngì kaayi bàvwà bakwàcike maalà! Mbûngì kaayi bwà mèkù... Mbintu bûngì kaayi—bûngì kaayi bìdì byenza mu cimvundù mu dîbà dyàpici edi, mu cimenga cinène eci!”

²⁰ Ki mukàjàànyì kungambila, kwambayè dîbà adi cintu bu nùнку, mùmvwà ngeela meeji ne: “Dilwa dyà kaaba aka dîbà adi ndifwànyine kwikala ne mushinga kaayi? Udi muumukè kumbèlu bwà kulwa apa bwà cinyì?”

²¹ Pashìishe mémè kwamba ne: “Bwalu bùdi nùнку ewu. Paanyimà pàà byònsò abi, bìdi cyà bushùwà mu ciibûngì, kàdi kùdi banyààbanyà bakesè mwinshì amu. Mmasambila bûngì kaayi a lulamatu àdiku mabànde mu dilòòlò dishààle edi muntwamu, àlwa ànu ku disangisha edi?”

²² Ne Yèyè ùvwa mwìmpè be kutùdì mu mùshindù wà ne èkèleeziyà yìvwa mifwànyine kwikala myùle patapata kumpàlà kwà dibwela dyà dîbà, mu mùshindù wà kanùyìkù mwà kubwela mu bulà bùdi bunyùngùlùkile mwaba awu abu to. Ne malongolodi awu ne bikwàbò, ki Mukalenge kwicikijaYè Nyumà Wendè ne kubàbèneshaYè. Ne mémè ncyàkadikànda bwà kutuuta ne bukolè bwónsò to, mvwa mutùngùnùke ànu ne kutuuta ne Èvànjeeliyò awu. Nènku misangu mikwàbò, mu bushùwà bwà bwalu, mbìkolè be, kàdi ki mùshindù wùmwèpelè wùndiku pàànyì mucimanyè. Mbishilè mwab'ewu. Pa nàнку nebiikàlè bitàmbe kushila ku Cìbàsà cyà Cilumbulwidi kwàkèngelàbi bwà twètù kiimana. Pa nàнку, mu byònsò, cìvwa ncintu cyà butùmbi. Nènku tudi baswè kusàkidila èkèleeziyà udi mwab'ewu ewu bwà kutùsambidila ne kutùtwa nyama ku mikòlò, ne—ne kutùlama pabwìpi ne nkùrusè.

²³ Nènkù mpindyewu mu dipingana dyà kumbèlu, mwômò emu, ne mvwa mufwànyine kwikala mulwè mu dindà emu pàmwápa bwà kusambidilakù bàmwè bàà ku babèèdi. Ndi ne yimwè yà ku miyiiki yà bàbìdi yìdi mindile, maalu a bàmwè bàà kùdìbo àndì mupetè mu ndambù wa matùkù à kacya ndwa kaaba aka, àvwà mindile ngondo mujimà kacya nya. Pa nànkù bàdi bàteeta bwà kubwela ne kufika kùdìbo ne lùkàsà lwónsò, kubapetela mu myaba mishìlèshìlàngàne mùdìbo bàsanganyiibwa amu.

²⁴ Bu Mukalenge mwà kwanyisha, mu mbingu mikwàbò bu yìbìdi nànkù awu, nyààya ku Tucson, aci ncitùpà cyà kwìnshì menemene. Nènkù mpindyewu beena kantu-ku-byanza musangu ewu, bwà nwàsambilaayikù bwà cyôci eci. . . Mémè ncitukù muswè kwenza cintu pàndi nciyi mwanji kwitabuujà ne ndiswà dyà Mukalenge to. Mpindyewu, mpungilu udi ulonda neenzekele mu Modesto ne pashìshe kuumuka amu kuya ku Washington, province awu, Washington, ne ku Zurich, pashìshe ku Pàlèstinà, ne pashìshe kubwela mu Àfrikè wa ku Sud. Ne byónsò abi bìdi byènzeka pankaci pàa mpindyewu ne ngondo mwisambòmbò. Nènkù mwà mubiikidìbwe bwà kwikala mwakudi wa mu mpungilu yónsò eyi. Nènkù mbifwànyinekù kumpà mpùngà wa kubwela cyàkàbìdi mu Àfrikè wa ku Sud. Dibiikila dyàbò, ku ngondo yónsò tudi tupeta dibiikila. Kàdi bu umwe. . .

²⁵ Kùdi ditàpuluka dinène mu èkèleeziyà, èkèleeziyà yà beena Mpenta. Nènkù wèwè muyè ku luseke lùmwè, bàà lukwàbò luseke kabààkwikalakù naaci bwalu to. Ne kabààkuswàku bwà kukwàcishangana mu mudimu to, pa nànkù ndi ànu muditòle mpindyewu kùkaadi bidimu bitwè ku bitaanu mwikàle ne dibiikila mu mwoyi wànyì bwà kuya. Nènkù mpindyewu, pàmwápa bu beena kantu-ku-byanza mwà kungaakidila, ànu bikùmbànekù bwà kushindama, aci nku nseke yónsò yìbìdi, nudi numòna's, nènkù aci cidikù cyènza ne bónsò bàlwe kutwilanganakù. Bidi bikèngela bwà kulwàbò ne kukwàcishangana mu cyôci aci bwalu majinga a mfrangà—majinga a èkèleeziyà yàbò àdikù, pa nànkù bikèngela bàlwe bwà kudibingisha, nwamònu's. Pa nànkù pàmwápa ncifwànyine kwikala diswa dyà Mukalenge, nànsha nànkù, mémè ncyèna mumanyè to. Cìdi cyùmvwika cìmpè, kàdi mémè ncyèna mumanyè to.

²⁶ Ne pashìshe, mu cidimu eci, Mwanèètù Borders mmumpèeshe ndongamu wa myaba yà kuya, anyì, mabiikila. Nènkù, bwà kwamba menemene, ciwà mmukàndà wà mupimbu *mòna* bunène wùdi mulwè kacya ànu ku Noël mushààle awu, wa mabiikila eku ne eku. Mbipìte bùngì bwà meeji a buntu bwà kuteeta bwà kucikùmbaja, pa nànkù ncyèna mwangate nànsha òmwè dyà ku òwò to. Nèngàngatè ànu disangisha òmwèpelè, ne ngindilè bwà mmonè mwaba wùdi Mukalenge ùngambila bwà

kuya kuumukila apu awu, pashiishe nênye ku wùdì wùlondà, ne pashiishe ku wùdì wùlondà, ne kwónsò kùdìYe ùngambila bwà kuya aku. Pa nàнку, nwànsambidilaayikù.

²⁷ Ndi mvùluka cidimu cishààle eci, pàmwè ne Mwanèètù wa balùme. . . anyi Mwanèètù wa bakàjì Cox ùdì kuntwaku awu, pààkambiikilà Mwanèètù Arganbright bwà nye mu lwendu elu lwà ku Anchorage. Kàdi bu ne mvwa mukùye ànu ku didicinkila ne bivwa ànu bîmpè?

²⁸ Mpindyewu, mvwà ndyambidila ne, *didicinkila*, mvwa muiiishe pa cyena-bwalu aci. Mémè kwamba pàngàakayà kuntwaku apu, kwambila bakwàci bàà mikàbà yà méyi abu ne: “Kanùkwàcikù mikàbà yà méyi to. Kanùyi bwà keela mikàbà yà méyi to, nênyiishè pa byena-bwalu bîmwèbîmwè bîmvwà muiiishè apa abi.” Ngeela meeji ne mvwa muiiishè cimwè cimwà muiiishe kaaba aka, bikwàbò byónsò bivwa bipyabipyà. Ki Mwanèètù Maguire kubîpetayè, byónsò abi.

²⁹ Kudicinkila. Nènku bu ne mvwa muyè, mwikàle *ndicinkila* kuntwaku, nùнку’s mbishiilàngàne cyà bushùwà ne mwàkenzekàbi amu, nùнку cikèènà-kumòna aci kî ncyùle to. Kàdi cikèènà-kumòna aci cyàkuula, ne nwènù bónsò nudi bamanyè aci, mwàkabènesHà Mukalenge.

³⁰ Mpindyewu, kùdì cikwàbò cintu cìdì mu mwoyi wànyì kùkaadi ntàntà mule. Èkéleeziyà, nùcisambidilaayi. Nwènù bónsò aba nudi bamanyè ne kacya ànu pàncìvwà mwànà mutekète ncitukù mwanjì kusànkishiibwa mu ditùnga edi to. Mwoyi wànyì wónsò wùtu misangu yónsò ànu mujingèjìnge kuya ku Wesètè. Ne ndi muvùlùke pàmvwà nkòsela màmwenàànyì mashinda mu kaalubànzà kakesè aku kuntu kwàka ne kàvwa. . .kàvwa nkàà èkéleeziyà ewu, mwaba awu. Mvwa musòmbe pa bibàndilu, ki Nyumà Mwîmpè kwakula naanyì, kwambaYè ne: “Ncyèna mwà kutùngunuka ne kukubènesha to paùdì kùyi uNtùmikila mu kaabujimà, bu Abraham.” Nwamònu anyi? Nènku, Abraham, Nzambì ùvwa mumwambile bwà kutàpulukayè ne kuyayè pàà nkàayendè. Nènku, pààkaditàpululàyè, yèyè wàkangata tatwèndè, ne mwànà wa mwanààbò e kuyayè naabò. Ne too ne pààkalwà Abraham kutùmikila Nzambì mu kaabujimà, ki dikùmbana mu kaabujimà dyà cìvwà Nzambì mumulayè kwenzekadi. Nènku dijità, òmwè dyà ku majità manènè àdì manswike kaaba aka, òvwa mmààmù. Aci nudi bamanyè. Kàdi mpindyewu mààmù wàmányì kuya bwà kiikala ne Mukalenge Yesù. Nènku ncyèna—ncyèna mumanyè ne njila wa kuya ngwepì, cyà dyenza ncinyì to, pa nàнку nwànsambidilaayikù.

³¹ Mpindyewu, Mwanèètù Neville, ndi mubànde pa cibùmbà cyà ku cyambilu apa, ndyàmbidila ne: “Èè, nênye kuntwaku.” Muntu kampànda kutwilanganayè naanyì ne kwambayè ne: “Èkélekèlè, bàdi ne disangisha dinènè be dilòlò edi.” Yèyè ne:

“Nebénzè mudimu wà diyiiisha, mudimu wà misambu, mudimu wà milòmbò, ne pashiishe kusangisha milàmbù, ne pashiishe mbambè ne bàdi ne—bàdi ne dyoweshangana dyà mâyi ku makàsà, mèèsà a Mukalenge, ne mudimu wà dibàtiiza.”

³² Mémè kudyàmbidila ne: “Mukwàcikwètù! Ekèlekèle! Ekèlekèle, byònsò abi, ndi mumanyè cidìku, pàmwápa paanyimà pàà muyiishè bikolè mu dindà emu.” Mpindyewu, mémè kudyàmbidila ne: “Nényemù, pàmwápa neàswe bwà mémè ndiishè mèèsà a Mukalenge.”

³³ Ki yêyè ne: “Udikù mwà kutùyiisha dilòlò edi anyi wêwè udyùmvwa mulombòdiibwe?” Pa nàнку mémè’s ndi mumanyè cidì aci cyùmvwija. Ki díbà adi mémè kwalukila e kwangata Mufundu kampànda mwab’ewu ne kwangata tuntu ndambù tùmvwà mufunde, nènku pàmwápa Mukalenge neànkwàcishè bwà kuyiishakù ànu kaaDiyiisha kípì kàà mèbà matwe ku ànaayi cyanààná, ne pashiishe netwénzè dyoweshangana dyètù—dyètù dyà mâyi ku makàsà adi, ne pashiishe mèèsà a Mukalenge. Ne pashiishe, nènku, kaa, mémè, pàmwápa nêngiikalè mujikije kumpalà kwà díbà adi. To, mvwa ànu nnùyòbola cyanààná. Tusunsa tutwè ku makùmi àbìdì, makùmi àsàtù, ne pashiishe netwénzè dibàtiiza, dyowesh- . . . Cìdì cìlondà eci ncinyi, mmèèsà a Mukalenge anyi? Mèèsà a Mukalenge ngàdì àlondà eci, pashiishe mudimu wa dibàtiiza.

³⁴ Mpindyewu, tudi ne disànkà dyà ne nenùbatiiijibwè. Mpindyewu, Nzambì Yêyè mwanýishe ne byòbì bìMusànkisha, ne biikàle bìmpè bwà mpaasàtà ne cisàmbà, mu dindà dyà dyàlumuingu dilwalwà edi néndwe bwà kusambidila babèèdì, ne kuyiisha, bu Mukalenge mwà kwanyisha, dyalumingu dilwalwà edi, bwalu pàmwápa dyàlumuingu dilwalwà nêngiikalè cyàkàbìdì muyè díbà adi. Nènku mpindyewu pàndìmu apa, ndi muswè kubwela ne—ne kwakulakù kaaba aka, bwalu tudi mu mùshindù kampànda baswikàkàne bu bànà bàà muntu, ne mémè ne Mwanèètù Neville mwab’ewu, ne tudi—tudi banangàngàne muntu ne mukwèndè, ne tudi—tudi—tudi baswè kushààla pabwìpì ne kwambulwishangana muntu ne mukwèndè bu . . .

³⁵ Eci cìdì cyùmvwika bu cyà cinyangakaja cijila’s, kàdi ndi ntèkemena ne kacyèna cyùmvwika mùshindù awu kunùdì to, mwàkambà Mukalenge Cory musangu kampànda, yêyè . . . mvwa nsanganyiibwa mu diswishà dyà myèndù, mwikàle nsùmbishila cyàpù aci ma-àmpulès. Nènku yêyè kusùmba ma-àmpulès búngì cyanààná yìvwà mwà kumulama munda mwà bidimu bìnaayi anyi bitaanu, mémè kukùdimuka e kusùmba kàshinyi kàà Ford kùdiye. Yêyè ne: “Billy, ngeela meeji ne tudi ànu tukoonyangana paanyimà muntu ne mukwèndè’s.” Nènku aci’s, èè, s’cìdì ànu dikwàcishangana mu cikondo cyà lukèngelu. Pa nàнку aci’s—aci’s mmwòmò. Tudi bamanyè mwa kulwa ku disungilangana ku njìwù ne dikwàcishangana muntu ne mukwèndè.

³⁶ Mpindyewu, tuyaayi ku citùpà cyàci cyà meeji matòoke mpindyewu, ne mémè nciyi mutùpàkàne to, ngeela meeji ne ndi mmòna Mwanèètù Beeler paanyimà pààpa lwà mu ndekeelu mwàmwa, mwambi neetù mukwàbò. Ne leelù ewu pàngápícidikù, Mwanèètù Junie Jackson ùvwa mwimàne pambèlu apa mu bulà ne Mwanèètù Creech. Bàtu misangu mikwàbò ne mudimu mwab'ewu anyi? Mudimu wà dibàtiiza, mündi mmòna. Èyo, tudi mwà kulungolola màyi pùikalàbo ne muntu. Tudi—tudi ne màyi, èyo.

³⁷ Pa nàku mpindyewu, bu mudìbi ne netwikalè ne mèèsà a Mukalenge, mvwa ndyàmbidila ne mbifwànyine kwikala bimpè bu mémè mwà kwakula dībà adi pa mèèsà a Mukalenge ànu bwà tusunsa tukesè cyanààna.

³⁸ Mpindyewu, kumpàlà kwà twètù kusemena ku Dìyi, tuteekàayi bintu byònsò ku luseke mpindyewu, ne ngenzèlù yètù yònsò yà bwànà ne yà bilelè ayi, bwà—bwà tuseemenè mu Bwikadi bwà Nzambi ku disambila. Tùsambilàayi. Mpindyewu ne mitù yètù miinyika, ne ndi mutwìshùbwe ne myoyi yètù kàbìdì, kwòkò dilòmba kampànda mwab'ewu didi difwànyine...dyùdì muswè bwà dimanyishiibwè kùdì Nzambi, ne muswè bwà nkuvùlùkè kumpàlà kwà Nzambi, swàku ùdimanyishè mu kwela kwà cyanza muulu kùdì Nzambi. Nzambi àfilèku dilòmba dyà muntu ne muntu.

³⁹ Nzambi wa Bukolè bwònsò, Taatù wa Mukalenge wetù Yesù Kilistò, WàkaMubiisha ku bafwè ne kuMushikika ku dyàbalùmè dyà Mutàmbe bunène, mwikàle ne mwoyi kashidi bwà kutwàkwila pa bintu bitùdì twitabuuja ne Wàkatwenzela, ne tujikula ne ki mùdìbi. Tudi tulòmba, Mukalenge Nzambi, bwà dilòòlò edi ne, Ùfwekù mpèkaatù yètù luse. Kaa, tudi baswè kushààla mwinshi mwà Mashì misangu yònsò, bwalu katwèna bamanyè menemene cidì cifwànyine kwenzeka to. Maalu ònsò àkaadi pa kutwà ku ntengu, mutùdì tudyùmvwa, Mukalenge, ne dilwa dyà Mukalenge dikaadi pabwìpi. Ne tudi tudilongolola bwà kwenza lwendu. Nènku patùdì twela meeji ku lwendu, tudi bafwànyine kutùma meeji ku mishèètè, ne—ne bilàmbà byà pamutù ne bisàbaatà byà pamutù. Kàdì mùshindù mwinè wùdì elu lwendu lushilàngàne's! Kì ndiswikà dyà mabùki to; ndiàsùulula, diàtèekà dyà ku luseke. Bu mwàkambà musadidi Webè munène, Pòlò, mu Mukàndà wa Ebèlù, nshapità wa 12 ne: “Tudi tutèeka ku luseke bujitu ne bujitu bwònsò ne bupidyà bùdì butùjìngilà bipeepèle nùнку abu, bwà twamòna mwà kunyeema ne lutùlù lubilu lùdì lutùtèekela kumpàlà kwètù alu.”

⁴⁰ Nènku twètù katwèna mwà kwamba cipròfetà mpindyewu cyà bintu bimpè twambila bàà pa buloba bwà cyena-leelù aba to. Cintu cìmwèpelè citùdiku mwà kwamba mu cipròfetà ku Nyumà ndikèngà dyà cìmpicìmpi, ntàtù, dikanka dyà buloba, mavwala manènè a màyi a mbù, dībà ne ngondo bipangila kufila nsèsà, èkèleeziyà mu cikondo cyà Laòdikiyà, Kilistò pambèlu pàà

ciibi, ùkookola bwà kubwela. Éyi Nzambi! Ànu mùvwà Miikà wa kale awu, mmunyi mùvwàyekù mwà kubènèsha Aakàbà pàvwà cipròfeta cimulwisha? Mupròfeta munène wa bukolè awu, Eliyà, pàakaseemenàye kùdìye, ne bwalu ùvwa mushipè muntu uvwa kàyi mwenzè bwalu, Naabòtà awu, ki kwambayè ne: “Mbwa neyilakè mashi èbè.” Kàdi mmunyi mùvwàku Miikà mwà kwamba cipròfeta cimpè?

⁴¹ Mmunyi mùdiku bânà bàà leelù ewu bàdi bùle tètè ne Nyumà mwà kwamba cipròfeta cimpè bwà bantu babì, bàdi kabàyi bàcyùka maalu bàdi biipàte Mukalenge baMushiye pambèlu abu? Éyi Nzambi, tudì tumòna ànu bululu bwà cilumbulwidi cìcìlwalwà. Ne twela mbilà mikolè kùdì aba bàdi kabàyi balulàme ne: “Nyeemènaayi kùdì Mukalenge, bwalu Yèye ki udi Lubwebwe mu buloba bùme! Yèye ki udi Ciikishilu mu cikondo cyà cipeepèlè cìkolè cyà mvùla. Ne Dìna dyà Mukalenge didì Lumbu Lukolè, ne baakànè bàdi bànyeemenaMù ne bàsanganyibwa mu dikùbiibwa.” Mmunyi mutùdiku mwà kutùma meeji ku bimenga binène biibaka, byà cinyeemenu abi, ne pàvwà mulumbacyanganyi. . . paanyimà pàa muntu awu ne yèye mubwelè mu—mu lumbu amu, ùvwa mu dikùbiibwa, cintu nànsha cìmwè kacìvwakù mwà kumulenga to. Éyi Nzambi, tũnyeemèku bakolèshe batàngile kùdì Mukalenge, bwalu Yèye ki udi Cinyeemenu cyètù ne Dikàndà dyètù, ne dikwàcisha mene ditù kadìyi dipangika mu cikondo cyà lutàtu. Pa nàнку, pa kumòna ne dísù dyà mukankù, mutùdì mwà kwamba, lutàtu lùvula, mavuba àdyùngwija, mikungulu ne mikenyi yà cilumbulwidi yìdikùma pa buloba, tudì tumanya ne mvùla wa cipùpù ùdi pabwìpì.

⁴² Dilòlò edi, Mukalenge, tudì tulòmba bwà aba bàdi beelè byanza byàbò muulu. Mèmè ncyèna mumanyè cìvwàbo baswè to, Taatù, Wèwè ngudi mumanyè. Ndi ndòmba bwà Wapèeshakù misùùkà yàbò yà musinga mukolè ayi bintu byònsò, dyumvwija didì paanyimà pàa cyanza cidi cyela muulu aci. Enzàku nàнку, Mukalenge. Ondòpàku babeèdi. Kànkamikàku bazengèle. Filakù disànkà kùdì bacìncimikiibwe. Filakù ditalala kùdì bazengèle, cyàkudyà kùdì bàdi ne nzala, cyàkunwà kùdì bàdi ne nyòotà, disànkà kùdì bàdi babungàme, bukolè kùdì èkèleziyà. Mukalenge, twàlakù Yesù munkaci mwètù dilòlò edi, patùkaadi tudìlongolola bwà kwangata mèèsà a Mukalenge àdi àleejà mubidi Wendè mucibùlùke awu apa. Tudì tulòmba, Mukalenge, bwà Yèye kutùmwènelakù mu mùshindù wà pabwàwù.

⁴³ Bèneshàku disangisha dikesè edi, mpaasàtà wadi munanga ewu, Mwanèètù Neville ne fàmiyè wendè, ne balami, balubuludi, ne muntu yònsò udipù awu. Bèneshàku bakwàbò, Mukalenge, pa buloba bujimà, bàdi bindile ne disànkà dilwa dyà Mukalenge abu, myèndù milongolola, ne mimbùndà yà mishi misukula

yônsò, ne Bukênkè bwà Èvànjeeliyò bwikàlè bùkenka mu myaba yà mîdimà.

⁴⁴ Mpindyewu, nkwàcìshèku, Mukalenge, ne Mêyi makesè aa. Àbènèshèku patùdì tuÀbala apa, ne tûpèèshèku dyumvwija, bwalu tudi tulòmba nùnkù mu Dîná dyà Yesù. Amen.

⁴⁵ Mpindyewu tudi bafwànyîne kubuulula mu Mukàndà, ku nshapità mwí6 wa Yone Munsantu, ne mbifwànyîne kwikala bîmpè bu muntu ne muntu wa kutùdì mubalè nshapità mujimà ewu patwikàlè baalùkilà kumbèlu apu. Ndi muswè kubala, kubangila ku mvensà wa 47, kupweka too ne ku wa 59, mukùmbajilakù, ànu bwà mùshindù wà kwibaka cyena-bwalu cyà ne: *Meesa À Mukalenge*.

Yesù ngudi wakula mpindyewu ewu, ku difestò. Cìvwa ncikondo cyà dicyònkómoka, maafestò aa. Bààkanwà màyi a mu lubwebwe, bwà kuleeja Lubwebwe lùvwà mu cipeela alu. Nènku bààkadyà, bwalu manà àkaavwa mamatè kùkaavwa bidimu nkàmà yàbùngì, bu civùlukilu. Cìvwa ànu difestò dyà paasàkà cyaanàà, mutùdì naadì dilòlò edi emu.

Bulelèlà, bulelèlà, Ndi nnwàmbila ne: Ewu udi ungiitabuujà mèmè ùdi ne mwoyi wà kashidi.

Mèmè ki dyàmpà dyà mwoyi adi.

Baatatwènú's bààkadyà manà mu cipèèlà, kàdi's mbafwè.

Eci ki dyàmpà didì dîpweka dîfùmina mu dyulu, didì muntu mwà kudyà, ne kàyi mwà kufwà to.

Mèmè ki dyàmpà didì ne mwoyi didì dîfùme mu dyulu: muntu yèyè mudyè dyàmpà edi, yèyè neikalè ne mwoyi bwà kashidi; ne dyàmpà dîngààfilà mmubidi wànyì, ki wùngààfilà bwà mwoyi wà bàà pa buloba.

Pa bwalu abu beena Yudà bààkakòkangana munkaci muàbò, bàmba ne: Mmunyi mùdì muntu ewu mwà kutùpèèsha mubidi wèndè bwà twètù kudyà?

Pashiishe Yesù wàkabàmbila ne: Bulelèlà, bulelèlà, Ndi nnwàmbila ne: Nwènú kanùyì badyè mubidi wa Mwànà wa muntu, ne banwè mashi èndè to, kanwèna ne mwoyi munda mwènú to.

Ewu udi udyà mubidi wànyì, ne ùnwa mashi àànyì, ùdi ne mwoyi wa cyèndèlèlèlè; ne mèmè nèmubùishè ku lufù mu ditùkù dyà ndekeelu.

Bwalu mubidi wànyì wùdi cyàkudyà cyà bushùwà, ne mashi àànyì àdì cyàkunwà cyà bushùwà.

Ewu udi udyà mubidi wànyì, ne ùnwa mashi àànyì, mmusòmbèle munda mwànyì, ne mèmè munda mwèndè.

*Bu mùdi Taatù udi ne mwoyi muntùme, ne mêmè
mwikàdìlè ne mwoyi ku Taatù, pa nànkù ewu udi undyà,
nànsha yéyè neikalè ne mwoyi ku mêmè.*

*Edi ndyâmpà didì difùma mu dyulu adi; kî mmùvwà
baatatwènù badyè manà amu, kàdi bafwè to; kadi ewu
udi udyà . . . dyâmpà edi neikalè ne mwoyi kashidi.*

*Bintu ebi yéyè wàkabyàmba mu nsunàngòngà,
pàvwàye ùlongesha mu Kaapènùmà.*

⁴⁶ Mukalenge àbeneshèku Diyì Dyèndè. Ndi muswè, ànu bwà tusunsa tukesè cyanààna, kwakula pa: *Mèèsà À Mukalenge*. Mwakù ewu *Kòòmunityò* wùdi wùmvwija cinyi? *Kwenza kòòmunityò* mbwena kwamba ne “kuyiikilangana.” Bwà kwikala ne, bwà . . . *Kòòmunityò* ùdi bulelèlè ùmvwija ne “kwikala ne bwobùmwè, kuyiikilangana muntu ne mukwèndè.” Wèwè uyiikila ku tèlefonè ne muntu, nudi nwenzakù muyiikì, nudi nwenza kòòmunityò muntu ne mukwèndè. Ne bu twètù mwà kuya ku luseke ne kwimanyina mu ndekeelu mwà citanda mwàmwa, muntu kanà yònsò ne mpaasàtà, anyi bantu kampànda bàbìdì, bàdi bènza kòòmunityò muntu ne mukwèndè.

⁴⁷ Mpindyewu, kanwèna nwenza kòòmunityò ku cisanji cyà tudyòmbà to, bwalu kwèna mwà kwandamuna to, anyi ku ntèlèviziyò. Kàdi pàdì . . . Nudi mwà kwenza ku tèlefonè, bwalu nudi nwenza kòòmunityò muntu ne mukwèndè, kabiyi ànu luseke lùmwe cyanààna to. Cìdì . . . Ncyèna mwà kwenza neenù kòòmunityò mpindyewu to, bwalu kanwèna nwandamuna to. Nènku, ki bwà cinyi, kî mbifwànyine kwikala dilwa kutèeleja mwambi kampànda ùyiisha diyiisha dyèndè to. Kì mbifwànyine kwikala nànkù to, kudìsanga, bwà kwenza kòòmunityò. Aci kî ncidì cifwànyine kwikala Kòòmunityò to . . . Wèwè ulwa ànu bwà kwenza kòòmunityò ne mwambi, udi mufwànyine kumubiikidila ku luseke, anyi muntu kanà yònsò ewu, ne kuyiikilangana nendè yéyè mulùme anyi mukàji.

⁴⁸ Kadi citudi tubwelela, mu mèèsà a Mukalenge, mbwà yònsò wa kutùdi bu bantu nkààya àyiikilanganè ne Kilistò. Kì dyenza dyà kòòmunityò ndyòdi adi. Dìbà adi, kuyiikilangana kakwèna menemene muntu *umwèpelè* wàkula, twètù nkààyeetù twakula to, kàdi nkwindile bwà kumòna cidìYe út wandamuna.

⁴⁹ Mpindyewu, pòpò apu, misangu yàbùngì, ki patùdi twenzela bilèma byètù binène, mbwena kwamba ne, twètù tudi twakula tumana katùyikù twindila bwà Yéyè kupeta mpungà wa kwandamuna to. Tutu misangu mikwàbò tuya, twamba ne: “Mukalenge, ndi muswè bwà Wèwè kwenza *cikampànda* ne *cikansanga*, amen,” kàdi tujuuka tuumuka tuya. Mpindyewu, ncyà bushùwà ne aci kî nkuyiikilangana to. Aku nkuya kalòmba dyanyishiibwa. Kàdi paùdi ushàala ntàntà bule bukùmbàne too ne pàdìYe wàndamuna, ki paùdi wenza kòòmunityò mpòpò apu, uyiikilangana ne Mukalenge. Mpindyewu, ne mùshindù munènè

wà kuyiikilangana, ngwà kwikala bumvwàngàne, nudi ne cyà kwitabangana pa bintu kampànda. Mpindyewu, bitu bikèmesha misangu mikwàbò ne patùdì tupeta biinè bintu abi . . .

⁵⁰ Didyà ndiswikakajakù. Mpindyewu, panùdì nwangata beena kantu-ku-byanza, pàdìbò baswè kwenza kaabwalu kàà dipetangana, bàtu bàbiikila muntu bwà kuyabò ku didyà. Ne paanyimà pàà bamanè kusòmba ne badyè, ki kushiishabò kuyiikila muntu ne mukwèndè. Pa ciibidilu, ngèndààmushingà mwîmpè kèna mwà kwakula ne muntu mwikàle kàyì mwelè kantu munda to. Mbîmpè bwà kwindilayè too ne pàdiye ùdyùmvwà bîmpè, ne pashiishe paanyimà pàà yèyè mumanè kudyà didyà dyèndè dyà mu dîndà. Kùyì kuntwaku bwà kumujuula mu bulààlù bwà kumwambila cintu kampànda cyùdì ukèba kumusumbisha to, kàdi indilà too ne piikalàye mudyè didyà dyèndè dyà mu dîndà ne—ne musòmbekù mu mùshindù mwîmpè.

⁵¹ Ditùkù adi, pâmvwà nyiisha pa mukàji wàkoowesha Yesù màyi ku makàsà awu, mu Canada mwàmwa mùmvwà ngaakula pa cyôci eci, ngamba ne pàvwà mwenyi ulwa bwà kukùmbula muntu mukwàbò, muntu ewu ùvwa ne mishindù kampànda milongolola yìvwà yikèngela bwà kupicilabò kumpàla kwà kudyùmvwabò cyà bushùwà bakùmbànàngàne bwà kukùmbulanganabò, anyì, bwà kuyiikilanganabò. Dyendelangana ndiyiikilangana. Mpindyewu, bàvwà bàlwa ku . . . Babiiikidiibwe, dyàmbedi bìvwà bikèngela bânji bàkubiikilè. Pashiishe uvwa mwà kulwa ku ciibi aku ne mwoweshanganyi wa màyi ku makàsà ùvwa wòweshangana màyi ku makàsà, bwalu mu lwendu, wèwè uvwa ne mupùùyà wà—wà nyama ne bikwàbò byà mu njila amu. Bòbò bònsò . . . bantu bàvwà bènzela ngendu mu njila umwèumwè pàmwe ne nyama, ne—ne dîbà adi kùvwà mupùùyà ne lupwishi, ne civwàlù cyà beena Pàlèstina civwà cìlwàmbula ne lùvwà lùlamata pa bisùlùlù byà ku mikòlò, ne kwisù kùvwà kakùyì kubwikila cintu aku, ne—ne ku byanza. Nènku—nènku bàvwà bàbiimanyikila ku ciibi aku, kùdì mwoweshanganyi wa màyi ku makàsà awu, ne ùvwa ùbòowesha màyi ku makàsà. Ne pashiishe muntu mukwàbò ùvwa mwimàne mwaba awu ne nsùmè ne—ne mànànanshì, nènku ùvwa ùmumyamina mànànanshì aa pa byanza, ne yèyè ùvwa mwà kuàlaabakaja mùshindù ewu, ne—ne ùàlaaba kwisù kwònsò, pashiishe wàngata nsùmè ùdikùpula. Aci civwà cyùmusha manyaanù ònsò ne mupùùyà. Nènku civwà ne cintu kampànda mu cyôci civwà cìfla citaleela, bu mùdì màntòlàtumù, ne civwà cyèenza ne yèyè àdyùmvwèku bilenga.

⁵² Pashiishe pàvwàye ùbwela, kùyì muvwàle bisàbaatà byèbè byà kale byà manyaanù abi to, mu tàpì milenga ayi, bàvwà mwà kwikala ne tuntu tukesè, bu mùdì pàntuufulè mikesè yà mu nzùbu ayi, nènku bàvwà bàbwela. Nènku dîbà adi mwenyi awu—awu ùvwa ùbwela ne—ne pashiishe mwakididyanganyi

awu ùvwa—ùvwa ùmutwà mishìkù yà dimujingila difika dilenga. Nènku, nwamònu's, kùvwa mwà kuswà bwà mwakididyanganyi kukutwàye mishìkù pawikalà ununka bibi to. Kùvwa mwà kuswà bwà kwendela pa tàpí ayi paùvwa ne manyaanù to. Ne pashiishe mukwakididi awu ùvwa ùkutwà mishìkù yà dikujingila difika dilenga, ne díbà adi wèwè uvwa ànu umwe wa ku bàà mu nzùbu awu.

⁵³ Nènku, mpindyewu, Nzambi ùtu ne bintu byà mùshindù awu. Kumpàlà kwà twètù kwikala cyà bushùwà badìlongòlòle bwà diyikilangana dyà Nzambi, tudi ne cyà kwanji kwoweshiibwa ne màyi a Dìyi. Ditàpuluka, màyi a ditàpulula àdi àtùtàpululà ne mpèkaatù yètù. Mpindyewu, cyà kumpàlà, kwèna mwà kwakula ne Nzambi ne kwèna mwà kuyiikilangana ne Nzambi to, nènku kùdi. . . Dyàmbedi, bikèngela ùnyingalalè bwà byùdi mwenzè, bwalu kwèna mwà kwitabuuya bìmpè paùdi kùyi ùnyingalala ne: “Mukalenge, mfwilèku luse ku bupidyà bwànyi” to. Nwamònu anyi? “Mfwilèku luse ku bupidyà bwànyi.” Bikèngela wànji kunyingalala, dyàmbedi. Nènku, paùdi ùnyingalala, díbà adi udi. . . mpèkaatù yèbè yà kale yidi yifwidiibwa luse, díbà adi udi muntu mudìlongòlòle díbà adi bwà dibàtiiza. Mpindyewu, pashiishe Yèyè mmulayè Nyumà Mwimpè, paanyimà pàà dibàtijiibwa.

⁵⁴ Mpindyewu, bwalu bùdìku bùdi ne, mu diyikilangana edi, tudi tusangana ne mùvwa dyoweshangana dyà—dyà màyi ku makàsà ne bintu biswikakaja ku cyòci aci, kàbìdi, bwà twètù kwowa màyi ku makàsà, bu cimfwànyi cya dikezudiibwa kùdi Nyumà Mwimpè.

⁵⁵ Mpindyewu, díbà adi, kùdi ne cyà kwikala njiyà kampàndà yà muntu ne mukwèndè. Panwikalà bùlùndù muulu bùlùndù panshì wèwè ne mwenyi webè—webè, díbà adi kanwèna—kanwèna mwà kuyiikilangana to. To, kanwèna—kanwèna mwà kucyènza to, bwalu wèwè udi ubèngangana nendè ku mèyi. Kàdi nwènù mu dipetangana, díbà adi nudi mwà kuyiikilangana. Nènku ki mùdibì patùdi tulwa ku mèèsà a Mukalenge, bìdi bikèngela bwà twikalè mu dipetangana ne Dìyi Dyèndè. Nwamònu anyi? Tudi ne cyà kwikala balediibwe cyàkàbìdi, Nyumà wa Nzambi munda mwètù wàmba “amen” ku Dìyi dyònsò didiYe mufunde, díbà adi tudi mwà kuyiikilangana Nendè.

⁵⁶ Eci nciitùdi bapetèle kùdi Nzambi ne, piikalà myoyi yètù kayiyi yitùpiisha to, díbà adi tudi tulengeleela Nzambi. Tudi bamanyè ne tudi tupeta mandamuna ku malòmba ètù, mbwalu myoyi yètù kayèena yitùpiisha to. Mpindyewu, piikalà Nzambi ùtwàmabila ne tudi ne cyà kulediibwa cyàkàbìdi, kàdi katùyi bapetè dilediibwa dipyadiya to, díbà adi netùdyūmvwèku bibi ndambù bwà kuya, bwà kaMulòmba nì ncinyi cyònsò, nwamònu's, bwalu tudi bamanyè ne katwèna bakùmbàje mishingà Yèndè to. Cintu cimwèpelè díbà adi cidi ndisambila

dyà ngènzàmpèkààtù. Kàdi tudi twakula Nendè patùdi mu bwobumwe Nendè, aci cidi citwàla kòomunyò.

⁵⁷ Mpindyewu, bwà mèèsà a Mukalenge, ndi njingakù kuumvwija kakesè ndambù. Mpindyewu, tudi twangata, citùdi tubiikila ne mèèsà a Mukalenge aci, ndyàmpà ne mvinyò. Mpindyewu, bàkaadi bacikònyàngàje mu mùshindù wà kabiyi mene bìmpè bwà kucyàmba to. Kaa, mùshindù mwinè wùdici cikònyangaja munda mwà bidimu's wè! Aci cyà bushùwà kî mmèèsà a Mukalenge to, cidi ànu dilama dyà diyi ditùma. Nwamònu anyi? Mpindyewu, citùdi tucibiiikidila ne n'kòomunyò, mbwalu ncifùmìne mu nsangilu wà ba-Kàtòlikè wa ne ng'“Ukàristiyà Munsantu, udi mubidi mwena diinà wà Mukalenge Yesù.” Kàdi kî mmubidi wà Mukalenge Yesù to! Mmu civùlukilu cyanàànà cyà mubidi Wèndè.

⁵⁸ Nànsha bansaserdòsè anyi bayiishi bùngi kaayi, anyi ní nganyì udi ubènesha cyòci aci, cidi ànu dyàmpà ne mvinyò. Kakwènaku nsaserdòsè mutùdi...mùdibo bàtwàmbila, ne: “Nzambi mmwenzèjùbwè bwà kutèèlejila nsaserdòsè pàdiye ùkùdimuna kòomunyò apu,” cidibo bàbiikila ne n'kòomunyò aci, “Ukàristiyà, ùmukùdimuna ùlwa mubidi mwena diinà wà Mukalenge Yesù. Dìbà adi mwena kwitabuuja udi wàngata aci, ne aci kî mèèsà a Mukalenge.” Aci ncyà mafi!

⁵⁹ *Kuyiikilangana* kùdi “nkwakulangana ne, cintu kampànda cyùdi mwà kwambila bwalu ne cyòci cikwandamuna.” Kî diyiikilangana ndyòdi adi. Cyostiyà kacyèna mwà kwandamuna to. Pa nàнку, mu bushùwà bwà bwalu, kòomunyò wa cyà bushùwà n'Nyumà Mwìmpè mwikàle wàndamuna. Paùdi uMukonka, Pèndè wàndamuna, kî kòomunyò mulelèlè nyèyè awu. *Eci* ncivùlukilu, bwà kwangata...cyà dipoopediibwa Dyèndè pa nkùrusè ne dibiiishiibwa Dyèndè dyà ku lufù, kàdi kî n'kòomunyò to. Tudi tucibiiikila nàнку awu, kàdi kî ncyòci to. Ncifùmìne ku èkèleeziyà wà Kàtòlikè, mùdibo bàngata cyostiyà bu mutùvwà bumvwije ditùkù adi mu dilondangana adi amu, ne twamba cyòci aci pa *Bumpàngaanù Bùbèngangana Nè Bwena Kilistò*.

⁶⁰ “Mùshindù mwinè wùdi kaacyostiyà kakesè kàà cijèngù aka mubidi mwena diinà wà Kilisto's wè.” Mpindyewu, kî cidi èkèleeziyà wa Kàtòlikè wìtabuuja ncyòci aci. Nukàadikù bamòne, mu dipicila dyà ku èkèleeziyà, mùdibo bàtwa mu diina, bùumusha bifulu, ne bikwàbò amu anyi? Kî ng'èkèleeziyà awu to, ncyostiyà cidi muntwamu aci ne, “mubidi wùdi nsaserdòsè mukùdimùne muumùke ku cyostiyà mulwè mubidi mwena diinà wà Kilistò awu,” wùdi mpùku ne nkose mifwànyine kwangata kuya naawù awu's. Mòna's, kwèna, kwènàku mwà kwela meeji ku ngeelèlè wa bukàlàngà ne kwela meeji ne kapese kàà dyàmpà nkafwànyine kwikala mubidi wa Mukalenge Yesù to! Kacyènaku mwa kwenzeka to.

61 *Kòòmunyò* “nkuyiikilangana, ne cyôci cyândamuna, cintu kampànda cyùdi wakula naaci.” Mwakù mwinè *kuyiikilangana* mbwena kwamba ne “kwakula ne,” anyi, “kwikala muswikàkàne ne cintu kampànda cìdi cikwandamuna.” Nènku Nzambì ùdi ùkwandamuna, kòòmunyò. Ne cìcìdi ànu dyàmpà ne mvinyò, citùdi tubiikila ne n’*kòòmunyò*, aci’s.

62 Mpindyewu, Yesù mmwambè apa, pândi mbala ne: “Mubidi Wànyì ncyàkudyà ne cyàkunwà, Mashi Àànyì, mubidi ne Mashi bìdi ncyàkudyà ne cyàkunwà.”

63 Mpindyewu, tudi baswè kwela meeji kùdi Yesù ne kuMusanga kutùdi, cìvwàYe aci. Mubidi Wèndè ncinyi? Mubidi wà Kilistò ncinyi? Mmubidi wà beena kwitabuuja wùdi mudìsangè Nèndè mu Nyumà Mwímpè. Kaciyi lupìngù to, kaciyi kapese kàà dyàmpà to, kàdi Nyumà udi mu mwoyi wà mwena kwitabuuja, ne biikàle badìsangè pàmwè, bwà pàdi muntu ne Nzambì mwà kwakwishangana, bânà bàà balùmè ne bàà bakàjì bàà Nzambì. Muntu wa cìfwàkà, ku dyela dyà Mashi panshi kutwàlaci dilekelediibwa dyà mpèkaatù, nènku mulùme ewu ne mukàjì ewu, mwànà wa balùme anyi wa bakàjì, udi mu bwobùmwè ne Kilistò ewu, ùdi ùyiikilangana Nèndè, mubidi awu.

64 Ànu mùdi mulùmè ne mukàjèndè bafwànyine kusòmba ne kuyiikilanganapù, anyi mwànà wa balùmè ne mulundà wèndè mukàjì amu, Kilistò ne Èkèleeziyà Wèndè bàdi bàyiikilanga pàmwè. Ki bwà cinyi tudi mwà kuMumvwa wàkula, ne kumòna byà matùkù àcìvwavwà kumpàlà kwà kufikabi apa, ne mwà kwamba matùkù àcìvwavwà ne mmapwàngàne, bwalu tudi tuyiikilangana ne Nzambì Udi ne Cyèndèlèlè mu cyanza Cyèndè awu. Kuyiikilangana muntu ne mukwèndè, Mubidi wà Kilistò, Mubidi musokòme, wà nyuma wà Kilistò. Kawùyi mudìsangè ne lupìngù lwà mùshindù kanà wònsò, anyi ne dyàmpà anyi ne—ne mvinyò to, kàdi mu mmwènekèlu wa—wa nyumà.

65 Mpindyewu, Yesù wàkamba cintu cìmwècìmwè aci. Angàtaayi Yone Munsantu, nshapità mwi4, ùyiikila ne mukàjì wa ku ciinà cyà màyi awu, mukàjì awu ùvwa wàkula pa cintu bu ne: “Baataatù bèètù bààkanwà ku mpokolo ewu, ne bààkuumbula ciinà cyà màyi eci, Yakòbò, ne—ne yèyè wàkapà bânà bèndè ne ngombe yèndè màyi aa, kàdi Nwènu nudi nwamba ne: ‘Kuukwilaayi mu cimenga *kampànda*,’ ne bakwàbò bàmba ne: ‘Ku mukùnà ewu.’”

66 Yesù kwambaYè ànu—ànu bu ne: “Anjì indilà kakesè! Twètù tudi beena Yudà, ne tudi tuumvwa cidici, cìdi dikuukwila dyùmvwija. Kàdi tèlèjè eci, wèwè mukàjì. Dìbà dìlwalwà, ne ki mpindyewu mene, dyàkuukwilà bakuukwidi balelèlà Nzambì mu Nyumà ne mu Bulelèlà. ‘Dìyi Dyèbè didi Bulelèlà.’ Nènku Taatù ùdi wènda ùkèbangana ne aba bààMukuukwilà

mu Nyumà ne mu Dìyì, Bulelèlà. ‘Dìyì Dyèbè didi Bulelèlà.’” Mpindyewu, ki cyàkambilàYe mukàjì awu ncyôci aci.

⁶⁷ Nwamònu’s, Kilistò. . Nzambi n’Nyumà. *Kilistò* mbwena kwamba ne “mulaaba maanyi, muntu mulaaba Nzambi,” ki cìvwà ciMuvwijè Kilistò. Mpindyewu, Kilistò wàkamba ne: “Mémè ndi Cyàkudyà ne Cyàkunwà.” Kaciyi cyostiyà to, kaciyi cyostiyà citùdi twangata apa eci to. Aci kí n’Kilistò to. Mvinyò utùdi tunwà ku cyoshelu ewu, kí n’Kilistò to. Cìdi ciMuleeja Yèyè, mu mùshindù wà difwànyikija. Kàdi Kilistò n’Nyumà Mwímpè, dilaabiibwa didi pa Èkèleeziyà, ki Cyàkudyà ne Cyàkunwà.

⁶⁸ Mwadi wà mutàmbe bunènè wùdiku pa buloba bujimà, ndi ntékemena muntu nànsha umwe wa kunùdi kacya kàtukù mwanjì kuwùmvwà to, kàdi, pawikalà ukààdikù muwùmvwè, kakwènakù mwadi wùdi mwà kwikala mwomùmvwè ne mwadi wà nzala to. Paùdi umòna maamù ne mwanèndè wa mu dibòko, ne kàyi mwà kwenda bu mùdiye mutàmbe kuteketa, ne mwànà mukesè awu ùpunga ne lufù, ne kafù kuulàkàne bwà nzala, mutèèlèje dishikunkila dyà ku mwoyi wà maamù awu adi, kumòna mwànà awu ne tutàmà twèndè tubùyike mu mùshindù wà tushàale ànu dikòbà dilamàte ku mifùbà, ne tuubinyàngànyàngà twèndè túbàlakana, ne kàyi mwà kupàtula dìyì, ànu ne lutàtù, twìsù twèndè tulònzòmòke. Kakùtukù mwadi bu wà nzala ne nyòòtà to.

⁶⁹ Pààkapàtukàbo e kubwela mu bipèèlà, búngì bwinè bwà bantu bàkaadi bafwàfwàfwe bwà nyòòtà’s wè! Maalu-malonda búngiwù’s wè, byà mémè mufwànyine kunùlama bufùkù bujimà, ne maalu-malonda malelèlà a mu cipèèlà. Mùshindù mwinè wùdibi ne paùdi upeta. . . upeta nyòòtà, mùdi dyabùlù ùkupèèsha màyi a—a bakishi’s. Nukàadi babimònèmòne mùneemu emu, kabyèna bikèngela bwà wènwè kuya ku Wesètè bwà kubimòna nànsha. Upweka ne njila, ne bìmwèka bu ne kùdi màyi panshì mu njila amu. Yònsò wa kunùdi ukààdikù mumòne aci, ukààdikù mwendèshe màshinyi ne mumatè mu cibeeba awu. Awu mmàyi a bakishi a mafi. Mwaba ewu kùkaadi cikondo kampànda, kùkaadi bidimu bitwè ku bisàtù anyi binaayi, mvwa mubalè mwaba wùvwà mabata kampànda, àbùuka ènda àkòsolola ditungà, kumònawù màyi a bakishi ne kupònawù mu njila amu, èla meeji ne àvwa àdyèla mu màyi. Ki kusùnsukawù ànu nàka, madikùme mu njila mùvwà mùme amu, èla meeji ne àvwa ikila mu màyi, màyi a bakishi’s.

⁷⁰ Misangu miinè búngiyi yidi dyabùlù mwenzèle bantu cintu cimwècimwè aci, mubàpèèshe màyi a mafi a bakishi, kamùyì cintu nànsha cimwè muntwamu to, kàdi cidi ànu ndiitabuujja dyà budingìbudìngì cyanààna. Bantu bààbúngì leelù ewu bàdi bàpeta ntèndeleeleu wa budingìbudìngì, bàteeta kukwàtakaja cintu kampànda anyi bàdicinkila ne kùdi cintu kampànda pàdibi kabiyi nàнку to! Bu mpandanjila mukàjì mukesè

ewu uvwa wamba ne ùvwa mwindile too ne pàvwàye mwà kutwishiibwa apu awu. Mbímpè bwà twètù kwenza nàнку. Kwèna mwà kwalukila bwà kuteeta cyàkàbìdì to. Wèwè udi ne mpùngà umwèpelè, ne udi ne Dizòla adi, pa nàнку mbímpè tùpwekè buludì too ne ku kiipàcilà aku.

⁷¹ Mwadi wà nzala, tèelejàayi, mmwadi munène bwalu mmwadi wà dikènga. Muntu awu ùdi ùpùnga ne lufù. Nènku, kaa, bu twètukù mwà kufika pa kaaba aku, bu ditunga edikù mwà kufikakù mu mùshindù wà diikàle ne nzala yà Nzambi's wè! Ndifwà dyà ne nzala dibì ditàmbe dikaadiku matùngà bu mùdì Inde udi munkaci mwà kufwà lwà nzala mu mubidi wàwà, edi ditùngà dyòdì dìdì munkaci mwà kufwà nzala mu nyumà. Kàdi paanyimà pàà wèwè mumanè kufwà nzala ntàntà mule, bìdì bifika mu mùshindù wà kùyi umanya ne udi ne nzala to.

⁷² Ànu mùdì kuuminnyina ne mashika. Paanyimà pàà wèwè muyè kule menemene, mwikàle uminyina ne mashika, pashìshe paanyimà pàà katanci wèwè kuumvwa luuyà. Nènku paùdì wenza nàнку, udi upùnga ne lufù! Nènku ki lutàtù lùdiku dilòòlò edi ndwòlò alu. Èkèleeziyà mmikwàte mashika mu mùshindù wà ne yikaadi yùminnyina ne mashika kàdi yèla meeji ne yidi ne luuyà, ku buumambàlà, kàdi pàayi miikàle yifwa mu nyumà. Bàfwa! Kabàyi bàcimanya to. Ndekeelu wa byònsò, ùlààla panshì ùya mu tulù, ne ki cyònsò cìdiku ncyòci aci. Kàciyi ùbìika kàbìdì to, bwalu mashi èndè mmuuminnyine ne mashika mu mijilu.

⁷³ Mpindyewu, kwikala ne nyòòtà. Yesù wàkamba ne: “Mashi Àanyi ncyàkunwà cyà bushùwà.” Wèwè ne nzala yà Mwoyi, ne nzala yà Mwoyi, Yesù ngudi ne màyi àmwèpelè àdi mwà kumana nyòòtà ayi. “Lwàyi kÙndì, nwènù bònsò bàdì bàkwàta mudimu mukolè ne bambùle majitu.” Mu Bwàkabuulwìbà, mbambè ne: “Ewu udi ne nyòòtà àlwe ku mpokolo yà màyi a Mwoyi bwà kunwà kàyi ùfuta to.” Wèwè ne nyòòtà yà Mwoyi!

⁷⁴ Tudi tumòna ne balongi bàà mabùlungà a muulu bàdì bàdyànjlila kwamba ne, dìngà ditùkù mu citùpà cyà mbangilu eci anyi citùpà cyà kumpalà cyà ngondo, kubangila mu matùkù a ngondo àbìdì anyi àtaanu, anyi ditùkù kampànda dyà ngondo ewu, balongi bàà mabùlungà a muulu bàà ba-Indiens bàdi badyànjlila kwamba ne buloba nebùtaayikè bùshaalè tvingvingu. Kàdi bibèjibeji byà beena Àmèrikè bìdì biciseka. Mèmè ncyèna ngiitabuja ne buloba nebùtaayikè bùshaalè tvingvingu nànsha, kàdi ndi ngamba nshindika ne mbibì bwà kuciseka. Bwalu, cintu kampànda cìdì pabwìpì ne kwenzeka dimwè dyà ku matùkù àdì panshì aa, cintu cifwànàngàne ne cyòci aci, pààbwelà mabùlungà àtaanu aa, Mars, Jupiter ne Venus, ne—ne bikwàbò, mu byàbò—byàbò... Kacya kaàtukù macyènzè to. Kaa, bàdì bàmba ne pàmwàpa kùkaadi bidimu binunu makùmi àbìdì ne bitaanu, kàdi nganyi mwinè uvwakù bwà kucimanya?

⁷⁵ Ndi ndyànjila kwamba ne eci cidi ne ngangàcìlù wa mu nyumà. Mémè ndi ngiitabuuja ne ndibwela dyà mu cyalu dyà didileeja dyà Nzambì, bwà ne mabuulula manènè a Díyì neàkangudiibwè munda mwà cikondo eci. Vùlukàayi ne, bàdi bamba ne mitootò yisàtù nyàakabwelà mu bijèngù byàyi pààkalediibwà Yesù. Kàdi eyi nyitaanu, ne itaanu nngàsà, nombà wa ngàsà. Isàtù nnombà wa bupwàngàne. Itaanu nnombà wa ngàsà, J-e-s-u-s, n-g-â-s-à, f-a-i-t-h diitabuuja, ne bikwàbò. Nombà wa ngàsà! Nzambi Yèyè ùtùmakù bukòlè Bwèndè kùdi èkèleeziyà, neciikalè ngàsà Wèndè, kacýàkwikala ne mbwà ditùmikila dyà cisàmba nànsha. Ne Yeshàayi mmwambè, mu nshapità wa 40, mwà “kwela Yelusàlèmà lubilà ne, mvità yèndè yàkajika,” kàdi pèndè’s ùvwa mupiile bwà dikuukwila dyà mpìngù, kàdi cìvwa nngàsà wa Nzambì uvwa umutùminaci awu. Nzambi Yèyè ùtùtùmina cintu kanà cyònsò eci, neciikalè ngàsà Wèndè kàdi kaciyi dikùmbanyina dyètù to. Pa nànkù, cidi mwà kuumvwija cintu kampànda. Ndi mémè ndyànjila kwamba ne nekwikalè dishintuluka. Ncyèna mumanyè ciikalàci to, kàdi ndi ngiitabuuja ne cidi pabwìpi ne kwenzeka. Tudi pa . . . ànu mu mulàadilu wàci mpindyewu.

⁷⁶ Kàdi muntu yèyè ne nzala, àlwe kùdi Kilistò. Muntu yèyè ne nyòòtà, àlwe kùdi Kilistò. Yèyè ngudi umana nyòòtà. Yèyè ngudi Mujikiji wa nyòòtà yetù yònsò ne nzala.

⁷⁷ Mvwa ne kaabwalu kampànda kàtùbo bandondèle kùkaadi cikondo kampànda. Ndi mufwànyine kwikala mukàlondè mu èkèleeziyà ewu. Pàngiikalà mukàlondè, nùmfwilèku luse bwà dikàmbulula ànu bwà kulenga tuntu atu. Kùvwa mulombodi kampànda wa ba-Indiens, anyì, mutàngidi wa mùshindù kampànda wa ba-Indiens. Ùvwa ùkòsolwela mu citùpà cyà buloba cyà Navajo, nènku, kujiminayè. Dyèndè ùvwa n’Coy. Nènku ùvwa ùpweka ne kajila, kajila kàà nyama ya mwitu, ki kudyàmbidilayè ne: “Mpindyewu, mémè mulondè kajila aka, ncyà bushùwà ne nèmpetè màyi.” Kàdi kabalù kèndè kàvwa ne nyòòtà mu mùshindù wà ne kàkaavwa ne ludimi lupàtula pambèlu, lùme, mimpèmpè milwè mikùnze ne myumìnyine ne lusenga. Ùvwa mulamè mùshwalà wèndè kwìsù mu bipeepèlè bikòlè byà nsenga abi mu mùshindù wà ne wùkaavwa muumìnyine, ne yèyè ùkaavwa ùfwa, bwà kupanga màyi. Nènku ùvwa ùlombola kabalù kèndè aku pèndè ùmba ùfika mu kajila aku. Ki yèyè ne, pààkabàndàye pa kabalù aku yèyè kumòna kajila kàà nyama ya mwitu aku, kwambayè ne: “Ncyà bushùwà ne nekàkamfikishè ku màyi.” Ki kutùpikayè cibelu eku cibelu eku pa kabalù kèndè aku e kubangayè kupweka ne kajila aku.

⁷⁸ Ne kabalù kàvwa pàakù kamanyè ne kàvwa mu kajila kàà màyi. Mùshindù mwinè wùdi Nzambì ùpèèsha nyama yìdi tumàmà ayi disakiibwa’s! Ki kòkò kàdi kàpwekà ne kajila kàka. Ndekeelu wa byònsò, ndambù kukùdimukila ku luseke kampànda, ànu ndambù mukèsè ku kajila katuuta aku. Kabalù

kàkaavwa kaswè kukùdimukila ku luseke alu, kàdi Coy ùvwa ne meeji mashìilàngàne. Kuteetayè bwà kukàlama mu kajila kanènè kàà kalongolola aku, ki kubangayè kupweka kàdi kabalù kakàyi kaswè kuya to. Yèyè kukàsalula, kàdi kòkò kudila ne kubangakù kulonda njila mukwàbò. Ki kubangakù kukàdamana. Kàvwa katekète bikolè kapangè bukolè bwà kumwimansha.

⁷⁹ Ki kubangayè kukòka bikànù byà ku bisàbaatà, mu mùshindù wà ne wàkatàpa ne kabalù aku mpùtá, mutàmbe kwambulukila kuulu bwà kuya kapeta màyi, mwoyi wèndè wùvwa mufwànyine kupànda, mu mùshindù wà ne kabalù kààkiimana, kàzakalala, kàtùuka mashi. Ki kutàngilayè panshi, kutàngilayè panshi mwaba awu, ne kòkò kàvwa kàzakala mùshindù ewu ne kàmba kudishinda mwinshì mwèndè amu. Yèyè kukàtàngila, e kumònayè mashi mu luseke lwàkù amu. Yèyè ùvwa mwena Kilistò. Ki kwambilayè kabalù kèndè aku, yèyè ne: “Ntu misangu yàbùngì ànu muumvwè ne yà mwitu. . . anyi, nyama yìvwa ne disàkiibwa kampànda. Kabyèna bìmwèka bu ne musumbà mukesè wùvwa mukùdimùkile kwàka awu wùvwa mufwànyine kuya ku màyi to. Mbimwèke bu ne kajila kanènè aka nkafwànyine kulombola kutùyi yìya dîbà dyònsò ku màyi, kàdi,” yèyè ne, “wèwè pawikalà mungambùle ne lulamatu too ne apa, nèndondè disàkiibwa dyèbè adi.”

⁸⁰ Kaa, mùshindù mwinè wùndì ndyàmbidila ciinè aci bwà Kilistò's wè! Njila uyààya ku kabùtù mmwashila makunji ne mulongolola njila mujimà, kàdi kùdi njila mubùmbàkàne udi ufila ku Mwoyi. Nèkwikalè ànu bakesè bààWùpetà. Kàdi, kaciyi disàkiibwa to, kàdi Nyumà Mwìmpè ngwàkukùdimuna ku luseke ne kukutùma ku màyi a Mwoyi awu. Ndi mèmè ngeela meeji ne, Yèyè ngudi mumfikishe too ne pànkaadi apa, nèmMwangàtè too ne ku ndekeelu kwà njila.

⁸¹ Bwà kujikija bwalu abu, kàà—kààkayakù ntàntà wa citùpa cyà kilòmèètà to, mu mùshindù wà ne, dyàkàmwè, kabalù kàà lulamatu aku kààkadyèla mu ciinà cinènè cyà màyi. Kabalù kàvwa kamanyè cìvwàku kàmba, cìvwàku kaswè kwamba mu mùshindù wàkù wà dyambila uvwa mukàbànde awu. Kubwelayè muntwamu. Kwambayè ne wàkakùpa màyi mu dyùlù dyà kabalù aku. Wàkoowa màyi pambidi, yèyè kwela mbilà mikolè ne mikunda, ne ùvwa wèla mbilà ne díyì dinàngula, ne ùdipòngolwela màyi pa muminu, wèla mbilà mikolè ne: “Twasùngidiibu! Twasùngidiibu! Twasùngidiibu!” Ki kabalù aku, munkaci mwà kunwà màyi, kàzakalala. Ki kutàngilayè nseke yà kabalù yìvwa yìtùuka mashi ayi, yònsò ayi dîbà adi mikèba kùdi byamù byà ku bisàbaatà abi.

⁸² Ki kwambayè ne ànu pa dîbà adi, yèyè kwamba. . . kuumvwa muntu wàmba ne: “Pàtukàayi mu màyi amu.” Ki kutàngilayè, nènku kùvwa kwimanè mwaba awuè mulami mukesè wa ngombe ne kwisù kunyangùkàngane kwònsò. Ki kupàtùkayè mu

mâyi amu. Kwambayè ne wàkumvwa mupùùyà wà mudilu, ne kutàngilayè eku ne eku, nènku kùvwa musùmbà wà bantu baasè citùùdilu mwaba awu. Bàvwa balwè mu lwendu lwà bukèbikebi. Bàvwa bapetè ngólò, kàdi mu njila wa dyalukila bàvwa ne tubalù twàbò ne bambwìshe tubalù majitu, kàdi kufikabò too ne ku ciinà cyà mâyi eci ne bàvwa biikìshe, ne bônso bakwàcike maalà.

⁸³ Ne kwambayè ne bàvwa benzè cikukù cyà munyìnyì wà kashà, ne kudyàye naabò. Ki yèyè ne, umwe wa kùdìbo kwambayè ne: “Nwàku maalà.” Kubàmbilayè ne yèyè ùvwa nganyì, ùvwa Jack Coy, mulombodi wa ba-Indiens. Ki awu ne: “Èè, mpindyewu, nwàku maalà.”

Yèyè ne: “To,” yèyè ne, “mémè ncìtu nnwà maalà to.”

⁸⁴ Nènku aci’s ncyenzè ànu bu cipendu bwà bantu abu. Ki yèyè ne: “Wèwè’s neùnwe maalà a kutùdì twètù!”

Yèyè ne: “To, mémè ncìtu nnwà maalà to.”

⁸⁵ Ki kwelayè kalòndò aku muulu, yèyè ne: “Angàtà maalà ùnwe!” Bakwàcike maalà, bóbò bônso, nudi bamanyè’s, bantu batwè ku bàsambòmbò.

Nènku ki yèyè ne: “Twasàkidilaayi, balùmyàna.”

⁸⁶ Yèyè ne: “Munyìnyì wètù wà kashà ewu ní mmwìmpèku bwà kudyà, maalà ètù a wìskì mmìmpè makùmbàne dinwà.”

⁸⁷ Kàdi’s nudi bamanyè mùtùbo, bakwàcike maalà. Ki yèyè ne: “To,” mwàkambàye.

⁸⁸ Ki kwelabò mutèlèngè mu cingoma, kwambabò ne: “Bwà mpindyewu kaayi, anyì unwànwa anyì mbùngà bwalu!”

⁸⁹ Yèyè ne: “To. To, ncyàkunwà to.” Ki awu kubangayè kuludikila cingoma aci. Yèyè ne: “Anjì indilà.” Yèyè ne: “Ncyèna ne bwôwà bwà kufwà to.” Yèyè ne: “Ncyèna—ncyèna ne bwôwà bwà kufwà to.” Yèyè ne: “Kàdi ndi—ndi muswè nkulondèlèku bwalu bwànyì ebu kumpàlà kwà mémè kufwà, cìdì cyènta ne nciikadi nnwà maalà.” Yèyè ne: “Ndi mwena Kentucky.” Yèyè ne: “Ne mu kazùbù kakesè kàà kale kàà micì mu dindà kampànda, mùvwà maamù mulàadika ùpunga ne lufù, wàkambiikidila ku luseke lwà bulààlù bwèndè, ne kwambayè ne: ‘Jack, tatwèbè wàkafwà ne dibùkì dyà twartà mu cyanza, ku mèèsà, mukwàcike.’ Ki yèyè ne: ‘Kùnukù maalà to, Jack wanyì, cyùdì wenza nànsha ciikàle cinyì.’” Ki yèyè ne: “Ki mémè kutenteka byanza byànyì pa mpàlà wa mààmù wanyì awu. Nènku mémè kulaya Nzambì, mwikàle kànà kakesè kàà balùmè kàà bidimu dikùmi, ncìvwakù mwà kunwà maalà àànyì a ntwàdijilu to.” Yèyè ne: “Kacya ncitukù muànwe nànsha.” Ki yèyè ne: “Mpindyewu wèwè muswè kungaasa cingoma, ngaasàaku.”

⁹⁰ Nènku pààkajuulà muntu mukwàcike awu cingoma cyèndè ne kalòndò aku muulu cyàkàbìdì, kwambayè ne: “Nwà maalà aa

cyanàànà ndi nkwasal!” Kàdi ànu apu cingoma cyumba citeema ne kalòndò aku kumba kàtaayika.

⁹¹ Ku luseke lwà lupòngò aku kùvwa kwimàne mulami mukesè wa ngombe, wa kwisù kunyangükàngàne, ne binsònjì bimupwekela pa matàmà. Yéyè ne: “Jack, ndi pàànyì wa ku Kentucky. Ngàkenzela mààmù kampànda mulayì dǐngà ditùkù, kàdi mèmè kushipa mulayì wànyì awu.” Yéyè ne: “Mvwa mwindile bwà balumyànà aba bàkwacikè bimpè, nènku mvwa ne cyà kubàshipa musumbà mujimà ewu, nànsha bìshi, kwangata ngòlò yònsò uvwabò nendè awu.” Yéyè ne: “Kàdi nkàadi mukwàcìkèkwàcìke maalà ne mwenzènze bibì. Kàdi,” yéyè ne, “ndi mutwìshìibwe ne pàdì mwadi wà cingoma cyànyì mubànde mupicìle mu mpòngò yà Dyulu apu, mààmù ùmvù ne ngàdicipi ne ncyàdyàkuànwakù kàbìdì to.” Ki mwaba awu, ku ngàsà wa Nzambì, kulombolayè bantu bònsò abu kùdì Kilistò, bònsò abu kuntwaku.

⁹² Nwamònu’s, kùdì cintu kampànda pa bwalu bwà màyi, cintu kampànda bwà cyashima. Bwalu bwànyì bùvwa ne, kufika ku màyi paùdì ne nyòòtà. Kùdì cintu kampànda cidìci cìkwenzela, nkufika ku màyi paùdì ne nyòòtà.

⁹³ Mpindyewu, Yéyè wàkamba ne: “Ndi nnùshìila ditalala Dyànyì. Ndi nnùpèèsha ditalala Dyànyì.” Kí mmùdì bàà pa buloba bànùpèèsha ditalala amu to, kàdi mùshìndù wùdìYe Yéyè ùnùpèèsha ditalala. Ditalala Dyèndè ndidì dìmanà nyòòtà yètù. Twètù tujinga ditalala, dìbà adi tùpetàayi cyashima mu ditalala Dyèndè, bwà kumanya ne tudi mu ditalala ne Nzambì ku Mukalenge wetù Yesù Kilistò. Yéyè ki wetù Mufidi wa ditalala udi umana nyòòtà yètù.

⁹⁴ Mvensà udi wamba ne: “Yéyè ùdì Cyàkudyà cyà bushùwà ne Cyàkunwà cyà bushùwà awu.” Ndi ne kaacimanyinu kakesè mwab’ewu, mvensà wa 57 awu ne: “Cyàkudyà cyà bushùwà ne Cyàkunwà cyà bushùwà.” Tèèlejàayi cyàkambàYe apa.

Nènku bu mùdì Taatù udi ne mwoyi muntùme, ne bu mùndì ne mwoyi ku Taatù Wanyì, pa nànkù ewu udi undyà mèmè, byà mwomùmawè yéyè neikalè ne mwoyi ku mèmè.

⁹⁵ Mu ngaakwilù mukwàbò ne: “Taatù mmuNtùme, ne Mèmè ndi ne mwoyi kùdìYe. Ne muntu yònsò udi ulwa kùdì Kilistò ùdì ne cyà kwikadila ne mwoyi ku Kilistò.” Kaa, ekèlekèle, s’ki bwalu mbwòbù abu, ki kòòmunyò nyéyè awu. Ki kòòmunyò mulelèlè wùdì upeta paùdì ne mwoyi ku Kilistò nyéyè awu.

⁹⁶ Mpindyewu, mibidi yètù yìdì dijinga ne cyàkudyà ne cyàkunwà ditùkù dyònsò, bwà kushààla ne mwoyi, mubidi wètù wà musunya ewu. Twètù katùyì tudyà cyàkudyà ditùkù dyònsò ne tunwà cyàkunwà to, dìbà adi mubidi wètù wùdì wùteketa. Kùdì cintu kampànda munda mwètù cidì cyènza ne tudi ne cyà kudyà cyàkudyà. Cyàkudyà cyà ditùkù dimwè kacyakushààlakù

too ne ku ditùkù didi dilondà to. Bidi bikèngela wikalè udyà ditùkù dyònsò, bwa kukolesha muntu webè wa cifwàkà awu. Udi mwà kutungunuka ne kwikala ne mwoyi, kàdi udi wenda uteketa. Nènku ditùkù diibìdì, udi uteketa bitàmbidile. Ne ditùkù diisàtù, udi wenda ushààla ne butekètè bwà dikèma.

⁹⁷ Èè, ki cyòci aci citùdì misangu yàbùngì twenza mu cipaapu cyà nyumà. Nudi numòna's, ditùkù dyònsò dicyacyà diiliilà edi bikèngela twikalè tuyiikilangana ne Kilistò. Bikèngela twakulè Nendè ku ditùkù ne ku ditùkù. Bikèngela tulongololanganè Nendè ditùkù dyònsò. Pòlò wàkamba ne: “Ndi mfwà ditùkù dyònsò.” Nwamònu anyi? “Ditùkù dyònsò, ndi mfwà; kàdi ndi ne mwoyi, kí mmémè to kàdi n’Kilistò udi ne mwoyi munda mwànyì.” Pa nàнку, pìikalà mubidi wèbè wà musunya awu ne cyàkudyà ditùkù dyònsò ne kunwà ditùkù dyònsò, bwà kushààlawù ne mwoyi, mubidi wèbè wà nyumà awu's wùdi wükèngela Cyàkudyà cyà nyumà ne kòomunyò ne Mukalenge ditùkù dyònsò, bwà kushààla ne mwoyi. Èyowà. Yesù wàkamba ne: “Muntu kààkwikala ne mwoyi ànu ku dyàmpà nkààyaadi to, kàdi ku Dìyì dyònsò didi dipàtukà mukana mwà Nzambi.” Pa nàнку, ditùkù dyònsò tudi ne cyà kulonga Bible. Bàmwè bantu kabàtu bàMulongakù to nànsha kakesè. Bàmwè bàtu bàMwambula misangu yìbìdì ànyì yisàtù ku cidimu. Kàdi, mwena kwitabuujà mulelèlè, mulelèlè ùdi mwibàkiibwe mu nyumà bulelèlè, ùdi ùbala Bible wendè ditùkù dyònsò, ne ùdi wàkula ne Mukalenge. Ncyà bushùwà. [Katùpà kàà mukàbà wà mèyi munda mutupù—Muf.] Ùdi ne cyà kwenza nàнку. “Muntu kààkwikala ne mwoyi ànu ku dyàmpà nkààyaadi to, kàdi ku Dìyì dyònsò didi dipàtukà mukana mwà Nzambi.”

⁹⁸ Mpindyewu, cikwàbò cintu citùdì tudiila cyàkudyà, mbwà kwibaka mubidi wètù bwà kukàndameenawù màsaamà. Wèwè kùyi udyà cyàkudyà to, mwikàle ulekela mubidi wèbè wènda wùteketa, dìbà adi wùdi wùshààla ku bukòokeshi bwà màsaamà. Màsaamà neàbwele buludi mu musùlù wà mashi, kàdi ki wèwè wàyi awu. Mashi èbè ówò kàyi mabanjike ne makezùke to, èè, dìbà adi, disaamà nedibwele buludi mu musùlù wèbè wà mashi. Pa nàнку bikèngela wikalè udyà byàkudyà bìmpè bìdì bìdiisha mubidi bwà kulama musùlù wèbè wà mashi bìmpè. Wèwè kùyi wenza nàнку to, wèwè kwèna wakamangana ne màsaamà to. Kì lutàtù lùdì naalù beena Kilistò bààbùngì ndwòlò alu.

⁹⁹ Bu mùdì micì mikoleshila mu nzùbu wa luuyà. Nudi bamanyè's, angàtà mucì mukoleshila mu nzùbu wa luuyà, bikèngela kuwengeleka. Wòwò kí mmumanyè mùdì kuulu kùmweka to. Kì mmumanyè muunya wà dìbà ne bikwàbò to, wùvwa wòwò ànu mubwikila ne mwengeleka. Nènku ki lutàtù lùdìku ne beena Kilistò bààbùngì menemene bàà ku dìnà, mmicì yà mu nzùbu wa luuyà. Ncyà bushùwà, wòwò wùdi ku bukòokeshi bwà cìshiishì cyònsò cilwalwà aci! Nudi bamanyè's, wòwò wùdi ànu wà—wà. . . Yidi ànu micì yà—yà yikèngela ànu

kubèèja, bikèngela kwikala kuyipwidijila manga, anyi mici yà mamiinu masopakaja.

¹⁰⁰ Nudi bamanyè's, angàtā ngombe wa kale wa Hereford ùmulekèlèlè mu mpàtā mwāmwa, kàdi ùlekelelèmu ngombe wa nsèngù mile, ngombe wa nsèngù mile awu ùdi mwà kudimanyina yèyè mwinè njila bwalu nyama mumuna wa ku muji. Kàdi angàtā wa Brangus anyi wa Hereford musambakaja anyi wa dimiinu disopakaja, nngombe mutāmbe bulenga wa dibandila, cyà bushùwà, mutāmbe kwikala ùnyenya maanyi ne mubidi tumatuma, kàdi ùyilekèlèlè muntwamu, kayèèna mwà kudimanyina njila to. Neyifwe! Bikèngela kwikalabò bàyèngèleka. Nwamònu anyi?

¹⁰¹ Nènku ki lutàtù lùdiku leelù ewu ndwòlò alu, tudi ne beena Kilistò ne mvwādilu mutāmbe bwìmpè, èkèleeziyà mitāmbe bunène, ne dilonga dyà—dyà tūlaasà bùngi cyanaànà, tèlòlòjì ne tūyaayi, kàdi bikèngela kubèngèlekabò misangu yònsò, bikèngela nūkenketelè mu twabò tulòndò bwà cyanaànà kwèna umòna to nànsha kakesè. Cìdi citùkèngelà mbeena Kilistò bàà dimiinu dyà cyà bushùwà, balediibwe mwinshì mwà Mashi a Mukalenge Yesù, bàdi kabàyi ne mwoyi wà ku tèlòlòjì wa èkèleeziyà to, kàdi wa ku Dìyi dyà Nzambi, kòòmuniyò ne Kilistò. Dìyi dibwela munda mwà mwena kwitabuuja, mubidi wèndè—wèndè wà nyumà mmwibàkìibwe. Kì mmwànà mukoleshila mu nzùbù wa luuyà to!

¹⁰² Kùvwa mwambi kampànda uvwa wamba leelù ewu, mvwa mumuumvwè, wamba cyòci aci ku tudyombà, kwambayè ne, pàakabwelàye mu ditunga edi, ùvwa ne disaamà dinènè dyà mutù wà kapàla, ne bàvwa bàakula bwà dimupanda. Ne bàvwa bàmba ne nebènzè *cikampànda* ne *cikansanga*, ne bàkose cintu ne bàmupandè, ne bùùmushè katùpà kàà kajilu kàà munda mwà mimpèmpè, cìvwà mwà kwenza ne mpàlà wèndè àbuyikè, ne bikwàbò byà mùshindù awu. Ne kwambayè ne ùvwa munwè ntuku mijimà yà tumuma twà bwanga. Byenzè bu ne kùvwa tumuma twà bwanga bùngi cyanaànà tùvwàye ne cyà kwangata. Kàdi pàakafikàye kùdi ngàngàbukà mwìmpè mwena Kilistò, ngàngàbukà awu kwambayè ne: “Twànji tùpwe mwoyi byà tumuma ne tùpwe mwoyi byà dikupanda abi, ne twibakè mubidi bwà wàmònakù mwà kukàndameena mutù wà kapàla awu.” Ki cyòci aci's!

¹⁰³ Ncinyi cìdi cyènza bwà bantu kabàyi mwà kulààla pànu mùvwàbo bàlààla kwònsò eku? Bikèngela tùtwibwè cisalù bwà *cikampànda* ne lushìngi bwà *cikansanga*, ne tudipwidijila manga a mishindù yònsò. Bidi byènza cinyi? Bidi bituvwija batekètàngàne, tunyenya maanyi, bafwatàlèle, kabìyikù bìmpè to. Pàvwàbi ne muntu wa kale wàwa . . . Mòna's, tukaadi katuyi tùpetangana ne bintu byònsò to. Mpindyewu bàkaadi ne dibèngangana didi kadìyi mu dyòdi to ne bikwàbò byònsò.

104 Mvwa nsanganyibwa mu Àfrikè, nciyikù mwà kutwibwa cisàlù bwà màlèyalèya to. Kàdi bu kamwe kàà màlèyalèya kangiikile pa cyanza, s'mvwa mufwànyine kupeta màlèyalèya. Katwèna tùdila mwadi to, ne wèwè kwèna nànsha umanyakù to. Tùdi twikila, tùtùngunuka ànu ne kukwikila, kwàjikì, waàpeci. Wèwè mutùngùnùke ne kwikala ne mwoyi, newikalè naawù munda mwà bidimu dikùmi ne bitaanu. Ne pashùshe misangu mikwàbò neúfwe dîsaamà adi. Nènku kùvwa beena kalaba abu mu tuzùbù twàbò tukèsè, ne tumwe pa mikòlò yàbò pònsò apu, biikàle butakà. Tumwe twikàle túbàsùma, tumwe twà màlèyalèya, kàdi kabiyikù bìbàtàcisha to. Bwà cinyi? Bàkaavwa bapetè cisàlù. Bàvwa batwibwe cisàlù cyà kùdi Nzambi.

105 Nènku ki lutàtù lùdiku ne bantu leelù ewu ndwòlò alu. Ki lutàtù lùdiku ne èkèleeziyà ndwòlò alu. Tudi batàmbe kupeta nshìngì yà ku bwànà ne tèoloji mukwàtakaja kùdi bantu, mu mùshindù wà ne tudi bapwidijila manga. Cìdì citùkèngelà nditwibwà dyà cisàlù cyà Nzambi dyà kùdi Dìyi dya Mukalenge Nzambi. Muntu neikalè ne mwoyi ku ditùkù ne ku ditùkù ku Cyàkudyà cyà mùshindù awu, bwà kwibaka musùkà wèndè mu ditwibwà dyà cisàlù ku màsaamà a nyumà àdi àtuuta nkòkà ne àtupikà mu ditùngà dijimà emu. Ndi ne tuntu búngì cyanàànà tufùnda pa bwalu ebu, kàdi nebikengelè bwà ngùmanyikè.

106 Mpindyewu, dibàkaayi, dilongòlolaayi bwà ditwibwà dyà cisàlù. Mpindyewu, tudi ne mwoyi ku cyôci eci, mibidi yètù—yètù yìdi ne cyà kwikala ne cyôci eci. Nènku, twètù katùyi naaci to tudi dîbà adi bazànjika ku màsaamà a mìshindù yònsò. Nènku Dìyi dyà Nzambi, patùdi tuDìitabuuja ne tuDìitaba ku kòomunyò ne: “Mukalenge, Dìyi Dyèndè didi Bulelèlà.”

107 “Wanyì èkèleeziyà ùdi wàmba ne kabyèna bikèngela bwà wèwè kulediibwa cyàkàbìdi to. Bòbò bàdi bàmba ne: ‘Kulabulangana ku cyanza ki kulediibwa kwa cyàkàbìdi.’ Bàdi bàmba ne: ‘Dimyaminangana dyà màyi.’ Bàdi bàmba bintu bikwàbò byònsò ebi ne: ‘Ki cyôci aci, Taatù, Mwànà ne Nyumà Mwimpè.’” Kàdi Bible’s mmwambè bwà kubàtijiibwa mu Dîna dyà Yesù Kilistò. Nwamònu anyi? Mpindyewu, ndà kumpàlà ne ditwibwà dyà nshìngì dikwàtakaja adi pawikalà muswè, neùdivwijè wèwè mwinè mwena Kilistò mukwàtakaja. Nwamònu anyi? Kí ng’aci cìdì cìkukèngelà to.

108 Kwèna mwà kupeta Mwoyi to, ànu mupicile kùdi Kilistò. Nènku mpindyewu cìdì Dìyi Dyèndè dyènza ncinyi? Dyòdi ndidì diibakà mubidi wètù wà nyumà, wà dikàndà, patùdi tuyiikilangana Nèndè, bwà kukàndameena dyabùlù.

109 Wèwè udi wamba ne: “Mwanèètù Branham, aci cyùdi wamba ncinyi ne, ‘kuyiikilangana mu Dìyi Dyèndè?’”

110 Èyowà, Yèyè ùdi Dìyi. “Ku cibangidilu kwàkadi Dìyi, ne Dìyi dyàkadi ne Nzambi, ne Dìyi dyàkadi Nzambi. Ne Dìyi dyàkavwijibwa mubidi ne dyàkasòmbela munkaci mwètù.” Ne

twètù bikèngela tùdye mubidi Wèndè. Dìbà adi mubidi Wèndè n'Diyi Dyèndè, bwalu Yèyè ùdi Dìyi. Ne Yèyè mmwambè, mu Yone munsantu 15 ne: “Nwènù bashààle munda Mwànyì, ne kòòmunyò Wanyì, Dìyi Dyànyì, dìshààle munda mwènù, dìbà adi nudi mwà kulòmba cinùdi baswè ne nebànwènzèlèci.” Ki bwalu mbwòbù abu's. Aci ncilelèlà. Nwamònu's, nùlombè cinùdi baswè!

111 Cyùdi wenza ncinyi? Udi munkaci mwà kwibaka mubidi wèbè too ne ku ditwìbwà dyà cisàlù ku... Muntu kampàndà ùbwela wàmba ne: “Kaa, wetù èkèleeziyà kàtu wìtabuuja dyela dyà mbilà to.” Wamònu's, udi mwibakiibwe. Cinyi? Udi ne kòòmunyò munda mwèbè, Dìyi adi. Ne wèwè udi mutwìbwe cisàlù ku cyòci aci. Mushiki wà lukutukutu wòwò mubwelèmu, ncinyi aci? Kawèna ne Dìyi nànsha dimwè mu wòwò to, dìbà adi wèwè udi mutwìshìibwe ne ngwà mafi. Nànsha ciikàle cìmwèka cilelèlà bìshi, cyòci kaciyi Dìyi to cilekèlè. Cyà bushùwà, cilekèlè. Nànsha cyòci cyènza cinyi, cidi ne cyà kukùmbanangana ne Dìyi!

112 Mu disambila, pàmvwà ntèèla Miikà mwimàne mwaba awu, tàngilààyi, bìvwa bimwèka ànu byà cyà bushùwà menemene, pàvwà Izàlèlèlà mwaba awu apu, ne citùpà cyà buloba aci ciikàle cyàbò bòbò. Beenyi abu bàvwa babwelè ne babànyèngeci ne biibàkemù nzùbù yàbò bòbò, ne bàkaavwa basòmbèle mu citùpà cyà buloba cìvwà Nzambì mubàpèèshe. Pa nàнку bìvwa bimwèka ànu bu ne bapròfetà nkàmà yìnaayi bàà beena Ebèlù abu bàvwa babingè's. Kàdi, nudi bamanyè's, kùvwa cintu kampàndà cìvwà kùdi Yèhoshàfàtà ciikàle cyà nyumà, kwambayè ne: “Kwènàku ne mukwàbò anyi?”

113 Yèyè ne: “Ndi ne mukwàbò, kàdi,” yèyè ne, “ntu mumukine. Cintu cìmwèpelè cìdiye yèyè wènza cidi ànu kwamba bipròfetà bibi.”

Yèyè ne: “Ndààyi nùkamwàngatèbi tumutèlèjè.”

114 Ki kubàndayè, yèyè ne: “Ndààku, ndààku kuntwaku, kàdi ndi mumòne Izàlèlèlà mutangàlàke bu mikòòkò kayiyi ne mulami.” Ki pashìishe yèyè kulonda cikèènà-kumònà cyèndè aci.

115 Mpindyewu, udi mubingè nganyi? S'ìvwa bimwèka ànu bu ne nkàmà yìnaayi ayi yìvwa mibingè's. Bantu nkàmà yìnaayi balongesha bìmpè, bàmba ne: “Ndààku, Mukalenge ùdi neebè.” Ne nànsha Zedèkiyà mwinè ùvwa ne—ne—ne—ùvwa ne... Zedèkiyà ùvwa ne nsèngù minène yìbidi yà cyamù yìvwayè mwenzè. Yèyè ne: “Ne yòyi eyi neusakè beenyi abu too ne pambèlù pàà buloba.” Ùvwa mutwìshìibwe ne ùvwa mubingè. Ùvwa mumanyè ne ùvwa mubingè. Kàdi, nudi numòna's, ùvwa mupiiile.

116 Nènkù kaaba aka, Miikà, umwe ùbèngangana ne nkàmà yìnaayi, ki yèyè ne: “Wèwè muyè, Izàlèèlà neátangalajìbwè, kabàyi ne mulami to.”

117 Kàdi bakwàbò abu bàvwa bàmba ne: “Ndààku, Mukalenge udi neebè!” Mpindyewu, mu mubidi emu, bàvwa babìngè, mwaba awu wùvwa wà Izàlèèlà. Kàdi Dìyi dyà Mukalenge dikaavwa dipiishe Aakàbà, nènkù mmunyi mùvwàku Nzambì mufwànyine kubènesha civwàYe mupìishe aci?

118 S’ki cyòci aci leelù ewu. Nwamònu anyi? Dìyi dyà kòòmuniyò dìvwa mu Miikà. Mpindyewu, pawìkalà uyiikilangana ne Nzambì mu dyangata dyà kòòmuniyò mulelèlà, kàdi nyumà munda mwèbè ùbèngangana ne Dìyi edi, kwèna munkaci mwà kuyiikilangana ne Nzambì to, udi uyiikilangana ne baadémons. Kàdi bóbò bàdi bàtentula bibì be! Bible mmwambè ne: “Mu matùkù a ndekeelu nebàseeswishè ne Basungula mene bu ne bìvwa mwà kwenzeka. Kàdi maulu ne buloba nebijiminè, kàdi Dìyi Dyànyi kadyàkujiminakù to.” Nènkù piikalà. . . Pólò mmwambè, mu Galàtiyà 1.8 ne: “Mwanjèlò wa mu dyulu yèyè muiyishè èvànjeeliyò mukwàbò nànsha wa bishi mushiilàngàne ne Ewu unùkaadi bamanè kutèeleja, èdiibwè mulawu.” Nànsha mene mwanjèlò! Mu èkèleeziyà wa ku cibangidilu, pàvwà bantu abu, mùdi Martìn Munsantu, Irénée, bantu bàà difwàna dyà Nzambì abu, pàvwà dyabùlù ùmwènèka bu mwanjèlò wa bukènkè. Kàdi, nwìkalàayi batàbàle, yèyè neikalè museesùke ndambù ku Dìyi.

119 Wàkamwènèkela Evà bu mwanjèlò wa bukènkè, kumwambilayè ne: “Bushùwà, Mukalenge mmwambè *cikampànda*, Mukalenge mmwambè *cikansanga*,” kàdi yèyè wàkabèngangana ne Nzambì ku ndekeelu mene. Ne ki mùshindù wùdi kòòmuniyò wa mashimi wènza leelù ewu nànkù. Pàdi bantu bèèla meeji ne bàdi bàsambila Nzambì, kàdi kabàyi baswè kutùmikila Dìyi to, awu nkòòmuniyò wa mashimi.

120 “Nwènù bashààle munda Mwànyi, ne Dìyi Dyànyi munda mwènù, díbà adi nùlombè cinùdi baswè,” nwamònu’s, “ne necyènjiibwè.” Mpindyewu, kacyèna mwà kukùmbanangana musangu wùmwè, pashiishe kubènga kukùmbanangana musangu wùdi wùlondà to. “Nwènù bashààle munda Mwànyi, Méyi Àanyi mashààle munda mwènù,” mbwena kwamba ne, kushààla mwaba awu. *Kushààla* mbwena kwamba ne “kwikishila mwaba awu, kushààla ànu mwaba awu.” Eyowà, ndi—nditwibwà dyà cisàlù ku màsaamà a mpèkaatù.

121 Mpindyewu, lekèlaayi njikijè mu kwamba kwà dìyi òmwèpelè edi mpindyewu, kumpàlà kwà twètù kupita ku mèèsà a Mukalenge. Mashi ne Mubidi wà Mukalenge, bisambakaja ne diitabuuja, ki Mashi ne Mubidi, ki Nyumà ne Dìyi, bisambakaja ne diitabuuja, mmwomùmwè ne Mwoyi wà Cyendèlèlè. “Ewu udi udyà Mubidi Wànyi ne ùnwa Mashi Àanyi ùdi ne Mwoyi

wà Cyendèlèlè, ne Mémè nêmmubiishè ku lufù ku ditùkù dyà ndekeelu.” Ki bwalu mbwòbù abu. Ncinyi aci? Kòòmunyò wa Mukalenge. Dîyi ne Nyumà, Mwoyi ewu wùdi mu Mashi, Dîyi ne Mashi mmwomùmwè ne Mwoyi wà Cyendèlèlè, ku diitabuuja mu Mukalenge.

¹²² Disambila dyànyì ndyôdi edi, pândi mmòna ndekeelu wènda ùseemena ne mmòna, ku kasunsa kanà kònsò ne, cintu kampànda ncifwànyine kwenzeka, ne mmanya ne katwèna kule ne Dilwa dyà Mukalenge to:

Mukalenge, díbà adi mu Dínà dyà Mukalenge Yesù, Mwánà wa Nzambi, ndekèlaku ngàngatè Dîyi, Mwelè wà mvità awu, ne ng’Ûnyùkùshè ne diitabuuja diinè dîndi naadi adi, ne mpengelè njila mu bukolè bwà démon ne démon yònsò, too ne pàngààmónà Yesù, ku diyiikilangana dyà ku Dîyi Dyèndè.

¹²³ Kuyiikilangana ne Dîyi Dyèndè. “Nwènu bashààle munda Mwànyì, ne Dîyi Dyànyì munda mwènu, díbà adi nùNdòmbè cinwàsà aci ne nebànwènzèlèci.” Bilenga be! Ki kòòmunyò wa cyà bushùwà ne Dîyi ne Nyumà nyèyè awu, pàmwè ne diitabuuja bwà kuCìnyùkùsha pàmwè ne: “Nùlombè cinùdi baswè, ne nebànwènzèlèci.” Tùsambilàayi.

¹²⁴ Nzambi Taatù wa ngàsà ne Wa ngiikàdilù milenga ne wa Cijila, NDI munène awu, El-Shaddai, bwà Abraham. Éyi Nzambi, mùshindù mwinè wùdi kòòmunyò munène wa Mukalenge ewu mwikàle mwomùmwè ne Mwoyi wa Cyendèlèlè, ne mùshindù wùdiCi citwàngana cisàlù ku maditàmbishi, mùshindù wùdiCi citwàngana cisàlù ku bupidyà, mùshindù wùdiCi citwàngana cisàlù ku mpèkaatù wa pa buloba! Cidi nkòòmunyò, ne dinanga dyà Nzambi kùdi Taatù wetù wa mu Dyulu. Ne ku bwakànè bwà Yesù Kilistò nkutùdi tupetela mùshindù wà kufika ku mèèsà aa. Nènku tudi tulòmba, Mukalenge, bwà Ùpeeshèku yònsò wa kutùdi mùshindù wa kufikakù dilòlò edi, mu Nyumà. Ùtùfwilèku luse. Ne tudi baswè bwà mibidi yètù yà nyumà yìkolè. Katwèna tucyùka byà diya kashààla wa mu èkèleeziyà anyi wa mu dìngumba kampànda abi to. Tudi baswè kwibaka mubidi wa nyumà, bwà kutwìbwa cisàlù ku mpèkaatù, mu mùshindù wà kakùyi kàbìdi dijinga dyà kwenza bibi to, ne mwaba wùdi Nyumà Mwìmpè mwà kwangata Dîyi Dyèndè Yèyè mwine ne mishikù yètù, ne kuDyàmba ne citaleelà ànu mwàkambiibwàDi mu ditùkù adi amu, bwalu Didi Nyumà umwèumwè uvwa munda mwà Mukalenge Yesù awu. Ndi ndòmba, Taatù, bwà Wèwè kutùpèeshakù cyòci aci.

¹²⁵ Mèbà àkaadi àjika. Bwà ne ndíbà kaayi, katwèna bamanyè to, dyàsùngidiibwà wa ndekeelu awu. Kàdi ndi ndòmba dilòlò edi, Mukalenge, kwòkò mwaba ewu bàdi kabàyi baKumanyè bu Musùngidi wabò, swàku bwà bàKupetè dilòlò edi pàdìbo bàlwa ku màyi a dibàtiiza aa apa, bu civùlukilu, bwà kujikwila mubidi wà beena kwitabuuja ewu ne mbiitabùùje bwalu abu bwà ne

Yesù wa mu Nazalèètà wàkalediibwa kùdi virgò Màriyà, ne kushipiibwa, kupoopediibwa pa nkurusè kùdi Ponsiyo Pilaatù, ne wàkabiishiibwa ku lufù mu ditùkù diisátù kùdi Nzambì, ne mmusòmbe ku dyàbalùmè dyà Mutàmbe Bunène, dilòòlò edi, mwikàle ne mwoyi kashidi bwà kutwàkwila.

¹²⁶ Enzàku, Mukalenge, bwà yèyè muntu umwèumwè, ùtùmikila mikenji yà Bible awu ne: “Nyingàlalaayi, muntu ne muntu wa kunùdi, nùbatijiibwè mu Dìna dyà Yesù Kilistò bwà dilekelediibwa dyà mpèkaatù yènù. Bwalu kakwèna dīngà dīna mwinshì mwà Dyulu dipà bantu munùdi ne cyà kusungidiibwa to.” Èyì Nzambi, swàku bwà bantu bàmonèku meji matòòkè mu bwalu abu, ne Dīyì didì kadīyì dùnyunga adi ne: “Kakwèna dīngà dīna mwinshì mwà Dyulu dipà bantu munùdi ne cyà kusungidiibwa to, pa kuumusha mu Dìna dyà Yesù Kilistò.” Ki bwà cinyì, mùpostòlò awu wàkamba ne: “Nyingàlalaayi, muntu ne muntu wa kunùdi ne nùbatijiibwè mu Dìna dyà Yesù Kilistò bwà dilekelediibwa dyà mpèkaatù, nènku nenùpetè kupà kwà Nyumà Mwimpè. Bwalu mulayi wùdi bwà cikondo ne cikondo cyònsò, mu búngì bwònsò bwàbìkilàbo kùdi Mukalenge Nzambi wetù abu.” Enzàku, Mukalenge, bwà kwìkalè dibìikila dyàbúngì dilòòlò edi.

¹²⁷ Ne mbambè kàbìdì, kùdi Mukalenge wetù ne: “Muntu nànsha umwe kèna mwà kulwa kùNdi pàdi Taatù Wanyì kàyi mumukòke to, ne bònsò bàdì Taatù muMpèeshe nebàlwe kùNdi. Mikòòkò Yanyì yidi yùmvwa Dīyì Dyànyì.” Mwenyi, ne mwenyi yèyè mwakùle, dīyì didì kadīyì dyà mu Mifundu, ne lùkàsà lwònsò mùkòòkò newùjìngùlùlè. Èyì Nzambi! Kàdi pìikalàbi ne n’Dīyì Dyèbè, Bible, cidìDi dyàmba aci, mùkòòkò wònsò newùDitèèlèjè, bwalu Didì Cyàkudyà cyà mikòòkò. Bààyiikidyàngànyì. Bààmányì ne n’Cyàkudyà cyà mùshindù kaayì cidì Taatù ùdìishangana naaci. “Muntu kààkwikala ne mwoyi ànu ku dyàmpà nkààyaadi to, kàdi ku Dīyì dyònsò didì dīpàtukà mukana mwà Nzambi.” Enzàku, Mukalenge, bwà bààbúngì bàmonè ne búmvwè, ne bàlwe Kùdi dilòòlò edi.

¹²⁸ Aba bàdì kabàyi ne Nyumà Mwimpè abu, swàku bwà kabàcilàadikijikù bàpicisha dībà dikwàbò dijimà to. Dībà didì mwà kwikala dimanè kupita paanyimà pàà dībà dimwè. Bàdi mwà kwikala kabàyi apa to.

¹²⁹ Nènku, Taatù, bu mutùdi badisangishe mpindyewu banyùngùlùkile mèèsà bwà kwangata cimfwànyì eci cyà mubidi Wèbè mucibula, tudi tulòmba ne kwòkò kwikàle mpèkaatù munkaci mwètù, Mukalenge, tūfwilèku luse. Wèwè udi mwambè ne: “Panùdi nudìsangisha, nwindilanganè.” Nzambì, kwòkò kwikàle mpèkaatù mu disangisha edi, mwaba kanà wònsò, ndi ndòmba bwà Mashi a Yesù Kilistò àtapululèku mulùme awu ne mpèkaatù wendè, anyì mukàji awu, mwànà wa balùme anyì wa bakàji. Nènku, Taatù, ndi ndòmba bwànyì mèmè mwinè ne, Wèwè ùntàpùlùlèku ne mpatà yònsò, mpèkaatù yònsò, bupidyà

bwònsò, cintu kanà cyònsò cidi. . . Tudi bamanyè ne bupidyà mmpèkaatù. Ki mpèkaatù umwèpelè udikù. “Ewu udi kàyi wìtabuuja mmumanè kupiishibwa.” Ne mpèkaatù umwèpelè udikù, nkubènga kwitabuuja Dìyì dyà Nzambi. Nènku, Taatù, kwòkò bupidyà kampànda munda mwànyì emu, mfwilèku luse, Èyì Nzambi, bùdikù búngì cyanààna, ne ndi ndòmba bwà Ùmfwilèku luse. Fwilakù disangisha dyànyì dy’Ùdi mumpèèshe dilòòlò edi luse, ne bàdiishèku ne Dìyì. Ènzàku nàнку.

¹³⁰ Ne patùdì twangata tuntu tukesè etu twà civùlukilu cyà mubidi mucibula wà Ewu Udi mubiishibwe ku bafwè ne mwikàle ne mwoyi kashidi ne kashidi munkaci mwètù, swàku bwà twàkidilè kòomunyò wa kùdi Ye, Mukalenge, diyikilangana dyà kùdi Nyumà Mwìmpè. Ènzàku nàнку, Taatù. Tudi tulòmba mu Dìna dyà Yesù. Amen.

¹³¹ Mpindyewu, bwènù nwènù bàdi ne cyà kuya ne kanùyì mwà kushààla bwà mudimu wà mèèsà a Mukalenge bwà tusunsa tutwè ku dikùmi ne tùtaanu. . . Katwèna bààbùngì to, nènku netwàngatè mèèsà a Mukalenge. Kì mmèèsà a Mukalenge a kaàyi a bantu bònsò nànsa. Kakùyì mpatà to ngàà mwena kwitabuuja mwena Kilistò yònsò. Nzambi kàtu ne mukàlù mwela pankaci pàà ba-Baptistes ne ba-Méthodistes, ne bakwàbò to. Tudi bònsò, ku Nyumà umwe, babàtùjìibwe mu Mubidi wùmwè, ne tudi beena mwàbò bàà Bukalenge bwà Nzambi. Nènku kwòkò muntu kampànda udi mwenyi munkaci mwètù, mèmè ncitu ntàmba kwikala apa to, ne ncitu mumanyè ne nganyì udi cidimba ne nganyì udi kàyi cidimba to. Vùlukààyi ne, nànsa wèwè mwikàle wa mu èkèleeziyà kaayi, aci kaciyèna ne bwalu to. Byòbi biinè, kùdi Èkèleeziyà ànu umwèpelè, ne kwèna ukàshààla wa Mwòmò to, udi ulediibwaMù. Neyà bushùwà. Nènku udi ulediibwa mu Èkèleeziyà wa Nzambi ewu. Nènku tudi tulòmba bwà wèwè kwakidila Kilistò dilòòlò edi, kuyiikilangana Nendè patùdì tuvùluka mubidi Wèndè mucibula apa, ne tuubintu tukesè tutùdì twangata, twà paasàkà etu, ne Nzambi àtùmyamìne Mashì mu myoyi yètù ne mu kondò kàà mwoyi.

¹³² Mpindyewu nebàlwè ne kòomunyò, nènku netùbalè mpindyewu mu Kolintò wa Kumpàla, nshapità wa 12. Nènku netwikalè mwà kudyà mèèsà a Mukalenge dyàkàmwè paanyimà pàà cyòci eci, ne tudi batwishibwe ne Nzambi neànùbènèshè byà biyiila ne panshì. Ne patùdì ànu ne twàbadi cyòci eci, anyi kumpàla kwà twètù kucibala, piikalàbi bikèngela bwà nwènù kuya, èè, nudi mwà kupàtuka ànu kakùyì bwalu to. Nènku pashìshe kwikala neetù cyàkàbìdì mu diisàtù dilòòlò, ne mu dyàlumingu mu dindà ne mu dyàlumingu dilòòlò. Bu nwènù mwa kushààla bwà kudyà neetù mèèsà a Mukalenge, netwikalè ne disànkà dyàbùngì bwà nwènù kuciyèna. Pashìshe dyàkàmwè paanyimà pàà cyòci aci, nekwikalè Mukalenge. . . nekwikalè mudimu wà dibàtiiza, wikalà mu tusunsa tutwè ku dikùmi ne

tutaanu, anyi makùmi àbìdì bwà twótò twàbúngì, mùndì ncinka. Kolintò wa Kumpàla, nshapità wa 11, mvensà wa 23.

...Ndi mupetè kùdì Mukalenge cìndì pàànyì munùtwàdìle ne: Mukalenge Yesù mu bufùkù bùmwebùmwe...bwàkamutungilàbo abu wàkangata dyàmpà,

Ne pàakamanàye kwamba disàkidila, wàkadìcìbula, ...kwambayè ne: Angàtaayi, ne nùdye: eci mmubidi wànyì, wùdì mucibùdìbwe bwà bwalu bwènù: nwìkalàayi nwenza nùнку bwà kumvùluka.

Byà mwomùmwe kàbìdì paanyimà yéyè wàkangata lupànzà, ne pàakamanàye kudyà didyà dyà dilòòlò, wàkamba ne: Eci ndupànzà lwà cipungidi cipyacipyà mu mashi àanyì: nwìkalàayi nwenza nùнку, misangu yònsò yinwàlùnwà, bwà kumvùluka.

Bwalu misangu yònsò yinwàdyà dyàmpà edi, ne yinwànwà lupànzà elu, nudi nuleeja paatòòke lufù lwà Mukalenge too ne pààlwàye.

Ki bwà cinyì ewu yònsò wabènga kudyà eci... ewu yònsò wàdyà dyàmpà edi, ne wànwà lupànzà lwà Mukalenge elu, kàyi mubikùmbànyine to, neikalè mupùile ku mubidi ne mashi byà Mukalenge.

Kàdi muntu àdìkenkètè yéyè mwinè, ne pa nàнку àdye dyàmpà adi, ne ànwè lupànzà alu.

Bwalu ewu udi udyà ne ùnwà kàyi mubikùmbànyine to, ùdi ùdya ne ùnwà dipùila bwèndè yéyè mwinè, kàyi ùjingulula mubidi wà Mukalenge to.

Bwà bwalu ebu bààbúngì bàdi bàsaama ne biikàle ne butekètè munkaci mwènù, ...bààbúngì mbalààle tulù.

Bwalu bu twètù mwà kudilumbulwisha twètù nkààyeetù, katùvwa ne cyà kulumbulwishiibwa to.

Kadi patùdi tulumbulwishiibwa, tudi tunyookiibwa kùdì Mukalenge, bwà katùlu kupùishiibwa pàmwe ne bàà pa buloba nànsha.

Ki bwà cinyì, bânà bèètù, panùdì nudìsangisha bwà kudyà, indìlàngànaayi muntu ne mukwèndè.

¹³³ Mpindyewu, ànu katanci kakesè cyanààna kàà disambila dyà cimùmà bwà muntu ne muntu wa kutùdì, nùnsambidilaayi pàndì mèmè nnùsambidila apa. [Mwanèètù Branham ùdi ùsambila bitekètèbitekètè—Muf.]...?...

Andàmùnàku ku malòmba aa, Nzambì wa Bukolè bwònsò. Tùfwilèku luse ku matomboka ètù mutùtù twètù pèètù tufwila aba bàtù bàtwènzèlè matomboka luse. Tudi tulòmba nùнку mu Dinà dyà Yesù Kìlistò. Amen.

¹³⁴ Tupese tukesè etu twà dyâmpà dyà kosher didi dyenza kadiyi ne mafutà, mukèlè, ne bikwàbò edi, didi dileeja mubidi wà Mukalenge. Kî ndyà cijèngù nànsha, ndicibula dyònsò tupese tupese. Mbwalu didi dyùmvwija mubidi Wèndè wàkacibudiibwà bwà bwalu bwètù awu. Nènku Nzambì àfilèku mabènesha Èndè kùdi muntu yònsò udi uwùdya awu. Mpindyewu, kî ngwòwò mubidi awu to, cidi cileeja ànu mubidi awu cyanààna. Mémè ncyèna ne bukolè to, muntu mukwàbò nànsha umwe kèna naabù to, bwà kucivwija cintu cishiilàngàna ne dyâmpà. Nzambì nkààyèndè. Nènku cyôci aci ki cyàkatwàmbilàYe, bwà twètù kudyà dyâmpà edi ne kunwà lupànza lwà mvinyò elu. Mpindyewu twìnyikààyaaku mitù yètù.

¹³⁵ Nzambì Mutàmbe Cijila, utùdi twètù basadidi Bèndè, mu Dìna dyà Yesù Kilstò, jidilàku dyâmpà edi bwà mudimu wùdidi dyenzela, bwà ne, patùdi tudyàkidila apa, ditùvùlwijèku ne Mukalenge wetù wàkapoopediibwa pa nkùrusè; ne mubidi Wèndè, wà mushinga mukolè ne wà cijila mùvwàwu amu, wùvwa musambakaja ne mibùndàbùndà ne mèbà ne misonso, bwètù twètù, bwà ku mubidi Wèndè wùdi mupanda awu kulwilakù Nyumà udi utùpèèsha Mwoyi wà Cyendèlèlèlè awu. Swàku bwà twètù, Mukalenge, patùdi tudyà cyôci eci apa, tùpetè ngàsà wa dyenza nendè lwendu, mwàkenzà Izalèlèlè munda mwà bidimu makùmi ànaayi mu cipèèlè, ne kakùyi muntu wa butekète nànsha umwe munkaci mwàbò to. Taatù Nzambì, enzàku nànkù, patùdi tuKulòmba bwà kujidila dyâmpà edi apa, dyâmpà dyà kòsher edi, bwà mudimu wùdidi dyenzela. Mu Dìna dyà Yesù. Amen.

¹³⁶ Lupànza lwà Dipungila Dipyadipya, Mashi. Ndi mvùluka musambu awu ne:

Kubangila ànu pàngààkàmonà ku diitabuuja
musùlù awu
Wùdi mpùtà Yèbè yìdi yizòloloka ayi yitwàla,
Dinanga dipikudi ki dikaadi cyànyì cyena-
bwalu,
Ne nediikalè nànkù too ne pàngààfwà.

¹³⁷ Pàndi mémè mmòna mashi aa, tumuma twà mvinyò, mashi a tumuma twà mvinyò aa, ndi mumanyè ne cidi cileeja Mashi àkapàtukà mu mubidi wà Mukalenge Yesù. Swàku bwà ewu yònsò udi wakidila cyôci eci awu àpetè Mwoyi wà Cyendèlèlèlè, mabèèdi àpatukè mu mibidi yàbò, swàku bwà dicyòkakana ne mateketa, dicìncimikiibwa, swàku bwà dyabùlù (mu mmwènekèlu yònsò) àbàshiyè, bwà bààmòna mwà kwikala ne dikàndà dinène ne bukolè bwà mubidi ne Mwoyi wa Cyendèlèlèlè, bwà kulekelabò bukènkè bwàbò kukenkesha kumpàlà kwà lukòngò lwà beena lwonji ne beena masandi lutùdimu ne mwoyi elu, bwà kutùmbishabò Nzambì.

¹³⁸ Taatù wa mu Dyulu, nyewù tuKuleeja mamuma a mucì wà mvinyò. Mu Dìná dyà Yesù Kìlistò, bìjìdìlèku, bwà kuleejabi Mashi a Mwan'Èbè, Yesù, mu Ôwò mmutùdì ne: “Mutàpìibwe mpùtá bwà dishipa dyètù dyà mikenji, ku mibùndàbùndà Yèndè twàkondopiibwa.” Enzàku, Mukalenge, bwà Mwoyi awu wùlwe kutùdì, Mwoyi wà Cyendèlèlè wà wùyiila ne panshì awu, bwà twamòna mwà kuKukwàcila mudimu bilenga menemene, kwikalakù ne dikàndà ne bukolè bwà mubidi bwà kuya neetù ku mwaba ne ku mwaba kutùdì tutèkemena ne netùKusadilè, kwònsò kuWàsàwà kutùbìkila aku. Fìlakù mabènesha aa, mu Dìná dyà Yesù, mmutùdì tulòmba emu. Amen.



MÈÈSÀ À MUKALENGE LUA62-0204
(Communion)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dilòòlò, mu matùkù à4 a ngondo mwibìdì, cidimu cyà 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org